



鷓書

卷一至卷五

本紀

高祖

煬帝

恭帝

隋書目錄

第一卷

帝紀一

高祖上

第二卷

帝紀二

高祖下

第三卷

帝紀三

煬帝上

第四卷

帝紀四



煬帝下

第五卷

帝紀五

恭帝

第六卷

志一

禮儀一

第七卷

志二

禮儀二

第八卷

志三

禮儀三

第九卷

志四

禮儀四

第十卷

志五

禮儀五

第十一卷

志六

禮儀六

第十二卷

志七

禮儀七

第十三卷

志八

音樂上

第十四卷

志九

音樂中

第十五卷

志十

音樂下

第十六卷

志十一

律曆上

第十七卷

志十二

律曆中

第十八卷

志十三

律曆下

第十九卷

志十四

天文上

第二十卷

志十五

天文中

第二十一卷

志十六

天文下

第二十二卷

志十七

五行上

第二十三卷

志十八

五行下

第二十四卷

志十九

食貨

第二十五卷

志二十

刑法

第二十六卷

志二十一

百官上

第二十七卷

志二十二

百官中

第二十八卷

志二十三

百官下

第二十九卷

志二十四

地理上

第三十卷

志二十五

地理中

第三十一卷

志二十六

地理下

第三十二卷

志二十七

經籍一經

第三十三卷

志二十八

經籍二史

第三十四卷

志二十九

經籍三子

第三十五卷

志三十

經籍四集道經佛經

第三十六卷

列傳一

后妃

文獻獨孤皇后

宣華夫人陳氏

容華夫人蔡氏

煬帝蕭皇后

第三十七卷

列傳二

李穆

子渾 穆兄子詢 詢弟崇 崇子敏

梁睿

第三十八卷

列傳三

劉昉

鄭譯

柳裘

皇甫績

盧賁

第三十九卷

列傳四

于義

子宜道 宜敏

陰壽

子世師 骨儀附

竇榮定

二京山

源雄

豆盧勣

子毓 勣兄通

賀若誼

第四十卷

列傳五

梁士彥

子剛

宇文忻

王誼

元諧

王世積

虞慶則

元胄

第四十一卷

列傳六

高頴

蘇威

子夔

第四十二卷

列傳七

李德林

第四十三卷

列傳八

河間王弘

子慶

楊處綱

楊子崇

觀德王雄

弟達

第四十四卷

列傳九

滕穆王瓚

嗣王綸

道悼王靜

衛昭王爽

嗣王集

蔡王智積

第四十五卷

列傳十

文四子

房陵王勇

子儼

秦孝王俊

子皓

庶人秀

庶人諒

第四十六卷

列傳十一

趙嬰

趙芬

楊尚希

長孫平

元暉

韋師

楊昇

蘇孝慈

兄子少羅

李雄

張昶

第四十七卷

列傳十二

韋世康

弟洸 藝 冲
從父弟壽

柳機

子述 機弟曰肅 從兄雄亮
從子寒之 族兄昂

第四十八卷

列傳十三

楊素

弟約 從父文思
文紀

第四十九卷

列傳十四

牛弘

第五十卷

列傳十五

宇文慶

李禮成

元孝矩

弟褒

郭榮

龐晃

李安

第五十一卷

列傳十六

長孫覽

從子熾
熾弟晟

第五十二卷

列傳十七

韓擒虎

弟僧壽 洪

賀若弼

第五十三卷

列傳十八

達奚長孺

賀婁子幹

史萬歲

劉方

第五十四卷

列傳十九

王長述

李衍

伊婁謙

田仁恭

元亨

杜整

李徹

崔彭

第五十五卷

列傳二十

杜彥

高勵

俞朱敞

周搖

獨孤楷

乞伏慧

張威

和洪

侯莫陳穎

第五十六卷

列傳二十一

盧愷

令狐熙

薛胄

宇文弼

張衡

楊汪

第五十七卷

列傳二十二

盧思道

季元操

薛道衡

從父兄昌衡

從弟孺

第五十八卷

列傳二十三

明克讓

魏澹

陸爽侯白

杜臺卿

辛德源

柳詵

許善心

李文博

第五十九卷

列傳二十四

煬三子

元德太子昭

齊王暕

趙王杲

第六十卷

列傳二十五

崔仲方

于仲文元巖從父弟

段文振

第六十一卷

列傳二十六

宇文述

郭衍

第六十二卷

列傳二十七

王韶

元巖

劉行本

梁毗

柳彧

趙綽

裴肅

第六十三卷

列傳二十八

樊子蓋

元壽

衛玄

史祥

楊義臣

劉權

第六十四卷

列傳二十九

李圓通

張定和

麥鐵杖

來護兒

陳稜

陳茂

張齋

沈光

魚俱羅

王辯

斛斯萬善

第六十五卷

列傳三十

周羅暎

李景

薛世雄

權武

董純

周灋尚

慕容三藏

王仁恭

吐萬緒

趙才

第六十六卷

列傳三十一

李諤

裴政

源師

高構

鮑宏

柳莊

郎茂

張虔威

榮毗

陸知命

房彥謙

第六十七卷

列傳三十二

虞世基

裴蘊

裴矩

第六十八卷

列傳三十三

宇文愷

閻毗

何稠

第六十九卷

列傳三十四

王劭

表充

第七十卷

列傳三十五

楊玄感

李子維 趙元淑 斛斯政 劉元振

李密

裴仁基

第七十一卷

列傳三十六

誠節

劉弘

皇甫誕

陶諧 敬

游元

馮慈明

張須陀

楊善會

獨孤盛

元文都

盧楚

劉子翊

堯君素陳孝意 張季珣 松贊

第七十二卷

列傳三十七

孝義

陸彥師

薛睿

楊慶

田翼

劉仕雋

翟普林

華秋

第七十三卷

列傳三十八

循吏

梁彥光

趙軌

公孫景茂

柳儉郭絢 敬肅

王伽

第七十四卷

列傳三十九

酷吏

庫狄士文

燕榮

田德懋

王頌

郭雋

紐回

郎方貴

李德饒

徐孝肅

第七十三卷

列傳三十八

循吏

梁彥光

趙軌

公孫景茂

柳儉郭絢 敬肅

王伽

第七十四卷

列傳三十九

酷吏

庫狄士文

燕榮

樊叔略

房恭懿

辛公義

劉曠

魏德深

田式

趙仲卿

崔弘度

弟弘昇

元弘嗣

王文同

第七十五卷

列傳四十

儒林

元善

辛彥之

何妥

蕭該
包愷

房暉遠

馬光

劉焯

劉炫

褚暉
張冲

顧彪
王孝籍

曾仲達

第七十六卷

列傳四十一

文學

劉臻

王頌

崔儵

諸葛穎

孫萬壽

王貞

虞綽

王胄

庾自直

潘徽

杜正玄

弟正藏

第七十七卷

列傳四十二

隱逸

李士謙

崔廓

子願

徐則

張文詡

第七十八卷

列傳四十三

藝術

庾季才 子質

耿詢

來和

楊伯醜

劉祐

許智藏

盧太翼

韋鼎

蕭吉

臨孝恭

張胄玄

萬寶常

第七十九卷

列傳四十四

外戚

獨孤羅 弟陀

蕭歸 子琮 琮弟歆

第八十卷

列傳四十五

列女

蘭陵公主

南陽公主

襄城王妃

華陽王妃

譙國夫人

鄭善果母

孝女王舜

韓覬妻

陸襄母

劉昶女

鍾士雄母

孝婦單氏

元務光母

裴倫妻

趙元楷妻

第八十一卷

列傳四十六

東夷

高麗

新羅

流求

百濟

靺鞨

倭國

第八十二卷

列傳四十七

南蠻

林邑

真臘

赤土

婆利

第八十三卷

列傳四十八

西域

吐谷渾

高昌

安國

女國

龜茲

于闐

吐火羅

米國

曹國

烏那曷

波斯

党項

康國

石國

焉耆

疎勒

鏗汗

挹怛國

史國

何國

穆國

漕國

附國

第八十四卷

列傳四十九

北狄

突厥

鐵勒

契丹 赫韃 室韃

西突厥
奚

第八十五卷

列傳五十

宇文化及

弟智及 裴虔通 司馬德戡

王充 段達

隋書目錄終

隋書卷一

帝紀第一

高祖上



特進臣魏

徵上



高祖文皇帝姓楊氏諱堅弘農郡華陰人也漢太尉震八代孫鉉
 仕燕為北平太守鉉生元壽後魏代為武川鎮司馬子孫因家焉
 元壽生太原太守惠 嘏 嘏生平原太守烈烈生寧遠將軍禎禎生
 忠忠即皇考也皇考從周太祖起義關西賜姓普六茹氏位至柱
 國大司空隋國公薨贈太保謚曰桓皇妣呂氏以大統七年六月
 癸丑夜生高祖於馮翊般若寺紫氣充庭有尼來自河東謂皇妣
 曰此兒所從來甚異不可於俗間處之尼將高祖舍於別館躬自
 撫養皇妣嘗抱高祖忽見頭上角出徧體鱗起皇妣大駭墜高祖
 於地尼自外入見曰已驚我兒致令晚得天下為人龍顏額上有

五柱入頂目光外射有文在手曰王長上短下沈深嚴重初入太學雖至親昵不敢狎也年十四京兆尹薛善辟爲功曹十五以太祖勲授散騎常侍車騎大將軍儀同三司封成紀縣公十六遷驃騎大將軍加開府周太祖見而歎曰此兒風骨不似代間人明帝卽位授右小宮伯進封太興郡公帝嘗遣善相者趙昭視之昭詭對曰不過作柱國耳旣而陰謂高祖曰公當爲天下君必大誅殺而後定善記鄙言武帝卽位遷左小宮伯出爲隋州刺史進位大將軍後徵還遇皇妣寢疾三年晝夜不離左右代稱純孝宇文護執政尤忌高祖屢將害焉大將軍侯伏侯壽等匡護得免其後襲爵隋國公武帝娉高祖長女爲皇太子妃益加禮重齊王憲言於帝曰普六茹堅相貌非常臣每見之不覺自失恐非人下請早除之帝曰此止可爲將耳內史王軌驟言於帝曰皇太子非社稷主普六茹堅貌有反相帝不悅曰必天命有在將若之何高祖甚懼深自晦匿建德中率水軍三萬破齊師於河橋明年從帝平齊進位柱國宇文憲破齊任城王高潛於冀州除定州總管先是定州城西門久閉不行齊文宣帝時或請開之以便行路帝不許曰當有聖人來啟之及高祖至而開焉莫不驚異尋轉亳州總管宣帝卽位以后父徵拜上柱國大司馬大象初遷大後丞右司武俄轉大前疑每巡幸恒委居守時帝爲刑經聖制其法深刻高祖以法令滋章非興化之道切諫不納高祖位望益隆帝頗以爲忌帝有四幸姬並爲皇后諸家爭寵數相毀譖帝每忿怒謂后曰必族滅爾家因召高祖命左右曰若色動卽殺之高祖旣至容色自若乃止大象二年五月以高祖爲楊州總管將發暴有足疾不果行乙未帝崩時靜帝幼沖未能親理政事內史上大夫鄭譯御正大夫劉

昉以高祖皇后之父衆望所歸遂矯詔引高祖入總朝政都督內
外諸軍事周氏諸王在藩者高祖悉恐其生變稱趙王招將嫁女
於突厥爲詞以徵之丁未發喪庚戌周帝拜高祖假黃鉞左大丞
相百官總已而聽焉以正陽宮爲丞相府以鄭譯爲長史劉昉爲
司馬具置寮佐宣帝時刑政苛酷羣心崩駭莫有固志至是高祖
大崇惠政法令清簡躬履節儉天下悅之六月趙王招陳王純越
王達代王盛滕王道並至于長安相州總管尉遲迥自以重臣宿
將志不能平遂舉兵東夏趙魏之士從者若流旬日之間衆至十
餘萬又宇文胄以滎州石碇以建州席毗以沛郡毗弟叉羅以竟
州皆應於迥迥遣子質於陳請援高祖命上柱國鄖國公韋孝寬
討之雍州牧畢王賢及趙陳等五王以天下之望歸於高祖因謀
詐亂高祖執賢斬之寢趙王等之罪因詔五王劔履上殿入朝不

史記卷一百一十五
留侯世家
史記卷一百一十五
留侯世家

趨用安其心七月陳將陳紀蕭摩訶等寇廣陵吳州總管于顛轉
擊破之廣陵人杜喬生聚衆反刺史元義討平之韋孝寬破尉遲
迥於相州傳首闕下餘黨悉平初迥之亂也鄖州總管司馬消難
據州響應淮南州縣多同之命襄州總管王誼討之消難奔陳荆
郢羣蠻乘釁作亂命亳州總管賀若誼討平之先是上柱國王謙
爲益州總管旣見幼主在位政由高祖遂起巴蜀之衆以匡復爲
辭高祖方以東夏山南爲事未遑致討謙進兵屯劔閣陷始州至
是乃命行軍元帥上柱國梁睿討平之傳首闕下巴蜀阻險人好
爲亂於是更開平道毀劔閣之路立銘垂誠焉五王陰謀滋甚高
祖齋酒肴以造趙王第欲觀所爲趙王伏甲以宴高祖高祖幾危
賴元胄以濟語在胄傳於是誅趙王招越王盛九月以世子勇爲
洛州總管東京小冢宰王子周帝詔曰假黃鉞使持節左大丞相

都督內外諸軍事上柱國大冢宰隋國公堅感山河之靈應星辰之氣道高雅俗德協幽顯釋巾登仕搢紳領屬開物成務朝野承風受詔先皇弼諧寡薄合天地而生萬物順陰陽而撫四夷近者內有艱虞外聞妖寇以鷹鷂之志運帷帳之謀行兩觀之誅掃萬里之外遐邇清肅實所賴焉四海之廣百官之富俱稟大訓咸餐至道治定功成棟梁斯託神猷盛德莫二於時可授大丞相罷左右丞相之官餘如故冬十月壬申詔贈高祖曾祖烈爲柱國太保都督徐兗等十州諸軍事徐州刺史隋國公謚曰康祖禎爲柱國太傅都督陝蒲等十三州諸軍事同州刺史隋國公謚曰獻考忠爲上柱國太師大冢宰都督冀定等十三州諸軍事雍州牧誅陳王純癸酉上柱國鄖國公韋孝寬卒十一月辛未誅代王達滕王道十二月甲子周帝詔曰天大地大合其德者聖人一陰一陽調

其氣者上宰所以降神載挺陶鑄羣生代蒼蒼之工成巍巍之業假黃鉞使持節大丞相都督內外諸軍事上柱國大冢宰隋國公應百代之期當千齡之運冢隆台鼎之盛門有翊贊之勤心同伊尹必致堯舜情類孔丘憲章文武爰初入仕風流映世公卿仰其軌物搢紳謂爲師表入處禁闈出居藩政芳猷茂績問望彌遠往平東夏人情未安燕南趙北實爲天府擁節杖旄任當連率柔之以德導之以禮畏之若神仰之若日芳風美迹歌頌獨存淮海榛蕪多歷年代作鎮南鄙選衆惟賢威震殊俗化行黔首任掌鈞陳職司邦政國之大事朝寄更深鑿駕巡遊留臺務廣周公陝西之任僅可爲倫漢臣關內之重未足相況及天崩地坼先帝升遐朕以眇年奄經荼毒親受顧命保乂皇家姦人乘隙潛圖宗社無君之意已成竊發之期有日英規潛運大略川迴匡國庇人罪人斯

得兩河遘亂三魏稱兵半天之下洵洵鼎沸祖宗之基已危一作生人

之命將始一作安陸作爨南通吳越蜂飛蠱聚江漢駭然巴蜀鳴張翻

將問鼎秦塗更阻漢門重閉畫籌帷帳建出師車諸將稟其謀壯

士感其義不違時日咸得清蕩九功遠被宋作破七德允諧百僚師師四

門穆穆光景照臨之地風雲去來之所允武允文幽明同德驪山

驟水遐邇歸心使朕繼踵上皇無為以治聲高宇宙道格天壤伊

尹輔殷霍光佐漢方之蔑如也昔營丘曲阜地多諸國重耳小白

錫用殊禮蕭何優贊拜之儀番君越公侯之爵姬劉以降代有令

謨一作宜崇典禮靈章自昔可授相國總百揆去都督內外諸軍事大

冢宰之號進公爵為王以隋州之崇業鄖州之安陸城陽溫州之

宜人應州之平靖上明順州之淮南士州之永川昌州之廣昌安

昌申州之義陽淮安息州之新蔡建安豫州之汝南臨賴廣寧初

安蔡州之蔡陽邳州之漢東二十郡為隋國劍履上殿入朝不趨

替拜不名備九錫之禮加璽紱遠遊冠相國印綠綬綬位在諸侯

王上隋國置丞相已下一依舊式高祖再讓不許乃受王爵十郡

而已詔進皇祖考爵並為王夫人為王妃辛巳司馬消難以陳師

寇江州刺史成休寧擊却之大定元年春二月壬子令日巳前賜

姓皆復其舊是日周帝詔曰伊周作輔不辭殊禮之錫桓文為霸

允應異物之典所以表格天之勳彰不代之業相國隋王前加典

策式昭大禮固守謙光絲言未綽宜申顯命一如往昔王功必先

人賞存後已退讓為本誠乖朕意宜命百辟盡詣王宮衆心克感

必令允納如有表奏勿復通聞癸丑文武百官詣闕敦勸高祖乃

受甲寅策曰咨爾假黃鉞使持節大丞相都督內外諸軍事上柱

國大冢宰隋王天覆地載藉人事以財成日往月來由王道而盈

具五氣陶鑄萬物流形誰代上玄之工斯則大聖而已曰惟先正
翊亮皇朝種德積善載誕上相精采不代風骨異人匡國濟時除
凶撥亂百神奉職萬國宅心殷相以先知悟人周輔乃弘道於代
方斯蔑如也今將授王典禮其敬聽朕命朕以不德早承丕緒上
靈降禍夙遭愍凶妖醜覬覦密圖社稷宮省之內疑慮驚心公受
命先皇志在匡弼輯諧內外潛運機衡姦人懼憚謀用不顯俾贊
旋之危爲太山之固是公重造皇室作霸之基也伊我祖考之代
任寄已深入掌禁兵外司藩政文經武略久播朝野戎軒大舉長
驅晉魏平陽震熊羆之勢冀部耀貔豹之威初平東夏人情未一
叢臺之兆易水之南西距并陘東至滄海北數千里舉袂如帷委
以連城建旌杖節教因其俗刑用輕典如泥從印猶草隨風此又
公之功也吳越不賓多歷年代淮海之外時非國有爰整其旅出
鎮於亭武以威物文以懷遠羣盜自奔外戶不閉人黎慕義襁負
而歸自北之風化行南國此又公之功也宣帝御寓任重宗臣入
典八屯外司九伐禁衛勤巡警之務治兵得蒐狩之禮此又公之
功也鑿駕遊幸頻委留臺文武注意軍國諮稟萬事咸理反顧無
憂此又公之功也朕在諒闇公實總已磐石之崇茲回者衆招引
無賴連結羣小往者國衰甫爾已創陰謀積惡數旬昆吾方稔泣
誅罄甸宗廟以寧此又公之功也尉迴猖狂稱兵鄴邑欲長戟而
指北闕強弩而圍南斗憑陵三魏之間震驚九州之半聚徒百萬
悉成蛇豕淇水洹水一飲而竭人之死生翻繫凶豎壽之長短不
由司命公乃戒彼鷹揚出車練卒誓蒼兕於河朔建瓴水於東山
口授兵書手畫行陣量敵制勝指日尅期諸將遵其成旨壯士感
其大義輕死忘生轉鬪千里旗鼓奮發如火燎毛玄黃變漳河之

水京觀比爵臺之峻百城氛祲一旦廓清此又公之力一作也青土連
率跨據東秦藉負海之饒倚連山之險望三輔而將逐鹿指六國
而願連雞風雨之兵助鬼爲虐本根既拔枝葉自殞屈法申恩示
以大信此又公之力功作也申部殘賊充斥一隅蠅飛蟻聚攻州略地
親則宗枝外藩巖邑影響鄴賊有同就燥迫脇更人叛換城戍偏
師討賊遂入網羅束之武牢有同囹圄事窮將軍如伏國刑此又
公之功也檀讓席毗擁眾河外陳韓梁鄭一多宋衛二字鄒魯村落成梟獍
之墟人庶爲豺狼之餌強以陵弱大則吞小城有晝閉巷無行人
授律出師隨機掃定讓既授首毗亦梟懸此又公之功也司馬消
難與一作興國親姻作鎮安陸性多嗜欲意好貪聚屬城子女劫掠靡餘
部人一作貨財多少具罄擅誅刺舉之使專殺儀台之臣懼罪畏威動

而內異蠶食郡縣煬毒華夷聞有王師自投南裔帝唐崇山之罰
僅可方此大漢流禦之刑是亦相匹逋逃入藪荆郢用安此又公
之功也王謙在蜀翻爲厲階閉劔閣之門塞靈關之宇自謂五丁
復起萬夫莫向分闢推轂嘗不踰時風馳席卷一舉大定擒斬兇
惡掃地無遺此又公之功也陳頊因循僞業自擅金陵屢遣醜徒
趨趨江北公指麾藩鎮無不摧殄方置文深之柱非止尉佗之拜
此又公之功也公有濟天下之勤重之以明德始於辟命屈已登
庸素業清微聲掩廊廟雄規神略氣蓋朝野序百揆而穆四門恥
一匡之舉九合尊賢崇德尚齒貴功錄舊旌善興亡繼絕寬猛相
濟彝倫攸叙敦睦帝親崇獎王室星象不圻一作陰陽自調玄冥祝融
如奉太公之召兩師風伯似應成王之宰祥風嘉氣觸石搖林瑞
獸異禽遊園鳴閣至功至德可大可久盡品物之和究杳冥之極

朕又聞之昔者明王設官胙土營丘四履得征五侯參墟寵章異其禮物故藩屏作固垂拱責成沉嘿巖廊不下堂席公道高往烈賞薄前王朕以眇身託于兆人之上求諸故實甚用懼焉往加大典憲章在昔謙以自牧未應朝禮日月不居便已隔歲時談物議其謂朕何今進授相國總百揆以申州之義陽等二十郡爲隋國今命使持節太傅上柱國杞國公椿大宗伯大將軍金城公趙瑛授相國印綬相國禮絕百辟任總羣官舊職常典宜與事革昔堯臣太尉舜佐司空姬旦相周霍光輔漢不居藩國唯在天朝其以相國總百揆去衆號焉上所假節大丞相大冢宰印綬又加九錫其敬聽朕後命以公執律脩德慎獄恤刑爲其訓範人無異志是用錫公大輅戎輅各一玄牡二駟公勤心地利所寶人天崇本務農公私殷阜是用錫公袞冕之服赤舄副焉公樂以移風雅以變

俗遐邇胥悅天地咸和是用錫公軒懸之樂六佾之舞公仁風德教覃及海隅荒忽幽遐迴首內向是用錫公朱戶以居公水鏡人倫銓衡庶職能官流詠遺賢必舉是用錫公納陛以登公執鈞於內正性率下犯義無禮罔不屏黜是用錫公武賁之士三百人公元本是用錫公鈇鉞各一公威嚴夏日精厲秋霜猗夏必誅顧盼天壤掃清姦宄折衝無外是用錫公彤弓一彤矢百盧弓十盧矢千惟公孝通神明肅恭祀典尊嚴如在情切幽明是用錫公秬鬯一卣珪瓚副焉隋國置丞相以下一遵舊式往欽哉其敬循往策祇服大典簡恤爾庶功對揚我太祖之休命於是建臺置官景辰詔王冕十有二旒建天子旌旗出警入蹕乘金根車駕六馬備五時副車置旄頭雲罕樂舞八佾設鐘虜宮懸王妃爲王后長子爲太子前後三讓乃受俄而周帝以衆望有歸乃下詔曰元氣肇闢樹

之以君有命不恒所輔惟德天心人事選賢與能盡四海而樂推
非一人而獨有周德將盡妖孽遞生骨肉多虞藩維構孽影響同
惡過半區宇或小或大圖帝圖王則我祖宗之業不絕如線相國
隋王獻聖自天英華獨秀刑法與禮儀同運文德共武功俱遠愛
萬物其如已任兆庶以爲憂手運機一作衡躬命將士芟夷姦宄刷蕩
氛祲化通冠帶威震幽遐虞舜之大功二十未足相比姬發之合
位三五豈可足論況木行已謝火運既興河洛出革命之符星辰
表代終之象烟雲改色笙簧變音獄訟咸歸謳歌盡至且天地合
德日月貞明故以稱大爲王照臨下土朕雖寡昧未達變通幽顯
之情皎然易識今便祇順天命出遜別宮禪位於隋一依唐虞漢
魏故事高祖三讓不許遣兼太傅上柱國杞國公椿奉冊曰咨爾
相國隋王粵若上古之初爰啟清濁降符授聖爲天下君事上帝

而理兆人和百靈而利萬物非以區寓之宮未以宸極爲尊大庭
軒轅以前驪連赫胥之日咸以無爲無欲不將不迎遐哉其詳不
可聞已厥有載籍遺文可觀聖莫逾於堯美未過於舜堯得太尉
已作運衡之篇舜遇司空便叙精華之竭彼寒裳脫屣貳宮設饗
百辟歸禹若帝之初斯蓋上則天時不敢不授下祇天命不可不
受湯代於夏武革於殷干戈揖讓雖復異揆應天順人其道靡異
自漢迄晉有魏至周天曆逐獄訟之歸神鼎隨謳歌之去道高者
稱帝錄一作錄書著不王與夫文祖神宗無以別也周德將盡禍難頻興
宗戚姦回咸將竊發顧瞻宮闕將圖宗社藩維連率逆亂相尋搖
蕩三方不合如礪蛇行鳥攫投足無所王受天明命獻德在躬救
頽運之艱匡墜地之業拯大川之溺撲燎原之火除羣凶於城社
廓妖氛於遠服至德合於造化神用洽於天壤八極九野萬方四

喬圓首方足罔不樂推往歲長星夜掃經天晝見八風比夏后之
作五緯同漢帝之聚除舊之徵昭然在上近者赤雀降祉玄龜效
靈鐘石變音蛟魚出穴布新之貺煥焉然一作在下九區歸徃百靈協贊
人神屬望我不獨知仰祇皇靈俯順人願今敬以帝位禪於爾躬
天祚告窮天祿永終於戲王宜允執厥和儀刑典訓升圓丘而敬
蒼昊御皇極而撫黔黎副率土之心恢無疆之祚可不盛歟遣大
宗伯大將軍金城公趙斐奉皇帝璽紱百官勸進高祖乃受焉
開皇元年二月甲子上自相府常服入宮備禮卽皇帝位於臨光
殿設壇於南郊遣使柴燎告天是日告廟大赦改元京師慶雲見
易周氏官儀依漢魏之舊以柱國相國司馬渤海郡公高類爲尚
書左僕射兼納言相國司錄沁源縣公虞慶則爲內史監兼吏部
尚書相國內郎咸安縣男李德林爲內史令上開府漢安縣公韋

世康爲禮部尚書上開府義寧縣公元暉爲都官尚書開府民部
尚書昌國縣公元巖爲兵部尚書上儀同司宗長孫毗爲工部尚
書上儀同司會楊尚希爲度支尚書上柱國雍州牧邗國公楊惠
爲左衛大將軍乙丑追尊皇考爲武元皇帝廟號太祖皇妣爲元
明皇后遣八使巡省風俗景寅修廟社立王后獨孤氏爲皇后王
太子勇爲皇太子丁卯以大將軍金城郡公趙斐爲尚書右僕射
上開府濟陽侯伊婁彥恭爲左武侯大將軍己巳以周帝爲介國
公邑五千戶爲隋室賓旌旗車服禮樂一如其舊上書不爲表答
表不稱詔周氏諸王盡降爲公辛未以皇弟同安郡公爽爲雍州
牧乙亥封皇弟邵國公慧爲滕王同安公爽爲衛王皇子雁門公
口廣○宋本諱爲晉王俊爲秦王秀爲越王諒爲漢王以上柱國并州總管申
國公李穆爲太師上柱國鄧國公竇熾爲太傅上柱國幽州總管

任國公于翼爲太尉觀國公田仁恭爲太子太師武德郡公柳敏
爲太子太保濟南郡公孫恕爲太子少傅開府蘇威爲太子少保
丁丑以晉王口唐書爲并州總管以陳留郡公楊智積爲蔡王興城郡
公楊靜爲道王戊寅以官牛五千頭分賜貧人三月辛巳高平獲
赤省太原獲蒼烏長安獲白雀各一宣仁門槐樹連理衆枝內附
壬午白狼國獻方物甲申太白晝見乙酉又晝見以上柱國元景
山爲安州總管丁亥詔犬馬器玩口味不得獻上戊子弛山澤之
禁以上開府當亭縣公賀若弼爲楚州總管和州刺史新義縣公
韓擒爲廬州總管己丑整屋縣獻連理樹植之宮庭辛卯以上柱
國神武郡公竇毅爲定州總管戊戌以太子少保蘇威兼納言吏
部尚書餘官如故庚子詔曰自古帝王受終革代建侯錫爵多與
運遷朕應錄受圖君臨海內載懷公革事有不同然則前帝後王

俱在兼濟立功立事爵賞仍行苟利於時其致一揆何謂物我之
異無計今古之殊其前代品爵悉可依舊丁未梁主蕭歸使其太
宰蕭巖司空劉義來賀四月辛巳大赦壬午太白歲星晝見戊戌
太常散樂並放爲百姓禁雜樂百戲辛丑陳散騎常侍韋鼎兼通
直散騎常侍王瑳來聘於周至而上巳受禪致之介國是月癸稽
胡修築長城二旬而罷五月戊子封邗國公楊雄爲廣平王永康
郡公楊弘爲河間王辛未介國公薨上舉哀於朝堂以其族人洛
嗣焉六月癸未詔以初受天命赤雀降祥五德相生赤爲火色其
郊及社廟依服冕之儀而朝會之服旗幟犧牲盡令尚赤戎服以
黃秋七月乙卯上始服黃百寮畢賀庚午靺鞨酋長貢方物八月
壬午廢東京官突厥阿波可汗遣使貢方物甲午遣行軍元帥樂
安公元諧擊吐谷渾於青海破而降之九月戊申戰亡之家遣使

振給庚午陳將周羅暎攻陷胡墅蕭摩訶寇江北辛未以越王秀
爲益州總管改封爲蜀王壬申以上柱國薛國公長孫覽上柱國
未安公元景山並爲行軍元帥以伐陳仍命尚書左僕射高頴節
度諸軍突厥沙鉢略可汗遣使貢方物是月行五銖錢冬十月乙
酉百濟王扶餘昌遣使來賀授昌上開府儀同三司帶方郡公戊
子行新律壬辰行幸岐州十一月乙卯以永昌郡公竇榮定爲右
武侯大將軍丁卯遣兼散騎侍郎鄭撫使於陳巳巳有流星聲如
墮墻光燭于地十二月戊寅以申州刺史爾朱敞爲金州總管甲
申以禮部尚書韋世康爲吏部尚書巳丑以柱國元袞爲鄜州總
管興勢郡公衛玄爲淮州總管庚子至自岐州戊寅高麗王高陽
遣使朝貢授陽大將軍遼東郡公太子太保柳敏卒

二年春正月癸丑幸上柱國王誼第庚申幸安成長公主第陳宣

帝殂子叔寶立辛酉置河北道行臺尚書省於并州廣○宋本諱爲

尚書令置河南道行臺尚書省於洛州以秦王俊爲尚書令置西

南道行臺尚書省於益州以蜀王秀爲尚書令戊辰陳遣使請和

歸我胡墅辛未高麗百濟並遣使貢方物甲戌詔舉賢良二月巳

丑詔高頴等班師庚寅以晉王廣○宋本諱爲左武衛大將軍秦王俊爲右

武衛大將軍餘官並如故辛卯幸趙國公獨孤陀第庚子京師雨

土三月戊申開渠引杜陽水於三時原四月丁丑以寧州刺史竇

榮定爲左武侯大將軍庚寅大將軍韓僧壽破突厥於雞頭山上

柱國李充破突厥於河北山五月戊申以上柱國開府長孫平爲

度支尚書巳酉早上親省囚徒其日大雨巳未高寶寧寇平州突

厥入長城庚申以豫州刺史皇甫績爲都官尚書壬戌太尉任國

公于翼薨甲子改傳國璽曰受命璽六月壬午以太府卿蘇孝慈

爲兵部尚書雍州牧衛王爽爲原州總管甲申使使弔於陳國乙酉上柱國李充破突厥於馬邑戊子以上柱國叱李長義爲蘭州總管辛卯以上開府爾朱敞爲徐州總管景申詔曰朕祇奉上玄君臨萬國屬生人之宋本作弊後倣此處前代之宮常以爲作之者勞居之者逸

改創之事心未遑也而王公大臣陳謀獻策咸云義農以降至于姬劉有當代而屢遷無革命而不徙曹馬之後時見因循乃末代之宴安非往聖之宏義此城從漢彫殘日久屢爲戰場舊經喪亂今之宮室事近權宜又非謀筮從龜瞻星揆日不足建皇王之邑合大衆所聚論變通之數具幽顯之情同心國請詞情深切然則京師百官之府四海歸向非朕一人之所獨有苟利於物其可違乎且殷之五遷恐人盡死是則以吉凶之土制長短之命謀新去故如農望秋雖暫劬勞其究安宅今區宇寧一陰陽順序安安以

遷勿懷胥怨龍首山川原秀麗卉物滋阜卜食相土宜建都邑定鼎之基永固無窮之業在斯公私府宅規模遠近營構資費隨事條奏仍詔左僕射高頴將作大匠劉龍鉅鹿郡公賀婁子幹太府少卿高龍義等創造新都秋八月癸巳以左武侯大將軍竇榮定爲秦州總管十月癸酉皇太子勇屯兵咸陽以備胡庚寅上疾愈享百寮於觀德殿賜錢帛皆任其自取盡力而出辛卯以營新都副監賀婁子幹爲工部尚書十一月景午高麗遣使獻方物十二月辛未上講武於後園甲戌上柱國竇毅卒景子名新都曰大典城乙酉遣沁源公虞慶則屯弘化備胡突厥寇周槃行軍總管達奚長儒擊之爲虜所敗景戌賜國子生經明者束帛丁亥親錄囚徒

三年春正月庚子將入新都大赦天下禁大刀長稍癸亥高麗遣

使來朝二月己巳朔日有蝕之壬申宴北道勲人癸酉陳遣兼散
騎常侍賀徹兼通直散騎常侍蕭褒來聘突厥寇邊甲戌涇陽獲
毛龜癸未以左衛大將軍李禮成爲右武衛大將軍三月丁未上
柱國鮮虞縣公謝慶恩卒己酉以上柱國達奚長儒爲蘭州總管
景辰雨常服入新都京師醴泉出丁巳詔購求遺書於天下庚申
宴百僚班賜各有差癸亥城榆關夏四月己巳上柱國建平郡公
于義卒庚午吐谷渾寇臨洮洮州刺史皮子信死之辛未高麗遣
使來朝壬申以尚書右僕射趙斐兼內史令丁酉以滕王瓚爲雍
州牧己卯衛王爽破突厥於白道庚辰行軍總管陰壽破高寶寧
於黃龍甲申早上親祈雨於國城之西南景戌詔天下勸學行禮
以濟北郡公梁遠爲汶州總管己丑陳郢州城主張子譏遣使請
降上以和好不納辛卯遣兼散騎常侍薛舒兼通直散騎常侍王
劭使於陳癸巳上親雩甲午突厥遣使來朝五月癸卯行軍總管
李晃破突厥於摩那渡口甲辰高麗遣使來朝乙巳梁太子蕭琮
來賀遷都丁未靺鞨貢方物戊申幽州總管陰壽卒辛酉有事於
方澤壬戌行軍元帥竇榮定破突厥及吐谷渾於涼州景寅赦黃
龍死罪己下六月庚午以衛王爽子集爲遂安郡王戊寅突厥遣
使請和庚辰行軍總管梁遠破吐谷渾於爾汗山斬其名王壬申
以晉州刺史燕榮爲青州總管己丑以河間王弘爲寧州總管乙
未幸安成長公主第秋七月辛丑以豫州刺史周搖爲幽州總管
壬戌詔曰行仁蹈義名教所先厲俗敦風宜見褒獎往者山東河
表經此妖亂孤城遠守多不自全濟陰太守杜猷身陷賊徒命懸
寇手郡省事范臺攻傾產營護免其戮辱眷言誠節實有可嘉宜
超恒賞用明沮勸臺攻可大都督假湘州刺史丁卯日有蝕之八

月丁丑鞞鞞貢方物已卯以右武衛大將軍李禮成爲襄州總管
壬午遣尚書左僕射高頴出寧州道內史監虞慶則出原州道並
爲行軍元帥以擊胡戊子上有事於太社九月壬子幸城東觀稼
穀癸丑大赦天下冬十月甲戌廢河南道行臺省以秦王俊爲秦
州總管十一月己酉發使巡省風俗因下詔曰朕君臨區宇深思
治術欲使生人從化以德代刑求草萊之善旌閭里之行民間情
僞咸欲備聞已詔使人所在振恤揚鑣分路將遍四海必令爲朕
耳目如有文武才用未爲時知宜以禮發遣朕將銓擢其有志節
高妙越等超倫亦仰使人就加旌異令一行一善獎勸於人遠近
官司遐邇風俗巨細必紀還日奏聞庶使不出戶庭坐知萬里庚
辰陳遣散騎常侍周墳通直散騎常侍表彥來聘陳主知上之貌
異世人使彥畫像持去甲午罷天下諸郡閏十二月乙卯遣兼散

皇周備
宏正傳不
所使備事

騎常侍曹令則通直散騎常侍魏澹使於陳戊午以上柱國竇榮
定爲右武衛大將軍刑部尚書蘇威爲民部尚書
四年春正月甲子日有蝕之己巳有事於太廟辛未有事於南郊
壬申梁主蕭巋來朝甲戌大射於北苑十日而罷壬午齊州水辛
卯渝州獲獸似麋一角同蹄壬辰班新曆二月乙巳上餞梁主於
霸上下未鞞鞞貢方物突厥蘇尼部男女萬餘人來降庚戌幸隴
州突厥可汗阿史那玷率其屬來降夏四月己亥敕總管刺史父
母及子年十五已上不得將之官庚子以吏部尚書虞慶則爲尚
書右僕射瀛州刺史楊尚希爲兵部尚書毛州刺史劉仁恩爲刑
部尚書甲辰以上柱國叱李長義爲信州總管丁未宴突厥高麗
吐谷渾使者於大興殿丁巳以上大將軍賀婁子幹爲榆關總管
五月癸酉契丹主莫賀弗遣使請降并大將軍景子以柱國馮昱

爲汾州總管乙酉以汴州刺史呂中泉爲延州總管六月庚子降
囚徒乙巳以鴻臚卿乙弗寔爲冀州總管上柱國豆盧勣爲夏州
總管壬子開渠自渭運門一作達河以通運漕戊午秦王俊來朝秋七月景
寅陳遣兼散騎常侍謝泉兼通直散騎常侍賀德基來聘八月甲
午遣十使巡省天下戊戌衛王爽來朝是日以秦王俊納妃宴百
寮班賜各有差壬寅上柱國太傅鄧國公竇熾薨丁未宴秦王官
屬賜物各有差壬子享陳使乙卯陳將夏侯苗請降上以通和不
納九月甲子幸襄國公主第乙丑幸霸水觀漕渠賜督役者帛各
有差巳巳上親錄囚徒庚午契丹內附甲戌駕幸洛陽關內饑也
癸未太白晝見冬十一月壬戌遣兼散騎常侍薛道衡通直散騎
常侍豆盧寔使於陳癸亥以榆關總管賀婁子幹爲雲州總管
五年春正月戊辰詔行新禮三月戊午以尚書左僕射高頴爲左

領軍大將軍上柱國宇文忻爲右領軍大將軍夏四月甲午契丹
主多彌遣使貢方物壬寅上柱國王誼謀反伏誅乙巳詔徵山東
馬榮伯等六儒戊申車駕至自洛陽五月甲申詔置義倉梁主蕭
歸俎其太子琮嗣立遣上大將軍元契使於突厥阿波可汗秋七
月庚申陳遣兼散騎常侍王詒兼通直散騎常侍阮卓來聘丁丑
以上柱國宇文慶爲涼州總管壬午突厥沙鉢略上表稱臣八月
景戌沙鉢略可汗遣子庫合真特勒來朝甲辰河南諸州水遣民
部尚書郗國公蘇威賑給之戊申有流星數百四散而下巳酉幸
栗園九月丁巳至自栗園乙丑改鮑陂曰杜陂霸水爲滋水陳將
湛文徹寇和州儀同三司費寶首獲之景子遣兼散騎常侍李若
兼通直散騎常侍崔君瞻使於陳冬十月壬辰以上柱國楊素爲
信州總管朔州總管吐萬緒爲徐州總管十一月甲子以上大將

軍源雄為朔州總管丁卯皇王廣○宋來朝十二月丁未降囚徒戊申
以上柱國達奚長儒為夏州總管

六年春正月甲子党項羌內附庚午班曆於突厥辛未以柱國韋
洸為安州總管壬申遣民部尚書蘇威巡省山東二月乙酉山南
荆浙七州水遣前工部尚書長孫毗振恤之景戌制刺史上佐每
歲暮更入朝上考課丁亥發丁男十一萬修築長城二旬而罷乙
未以上柱國崔弘度為襄州總管庚子大赦天下三月己未洛陽
男子高德上書請上為太上皇傳位皇太子上曰朕承天命撫育
蒼生日旰孜孜猶恐不逮豈學近代帝王事不師古傳位於子自
求逸樂者哉癸亥突厥沙鉢略遣使貢方物夏四月己亥陳遣兼
散騎常侍周磻兼通直散騎常侍江椿來聘秋七月辛亥河南諸
州水乙丑京師雨毛如馬鬣尾長者二尺餘短者六七寸八月辛

卯關內七州旱免其賦稅遣散騎常侍裴豪兼通直散騎常侍劉
顓聘於陳戊申上柱國太師申國公李穆薨閏月己酉以河州刺
史段文振為蘭州總管丁卯皇太子鎮洛陽辛未晉王廣○宋秦王俊
並來朝景子上柱國邠國公梁士彥上柱國杞國公宇文忻柱國
舒國公劉防以謀反伏誅上柱國許國公宇文善坐事除名九月
辛巳上素服御射殿詔百寮射賜梁士彥三家資物景戌上柱國
宋安郡公元景山卒庚子以上柱國李詢為隰州總管辛丑詔大
象已來死事之家咸令振恤冬十月己酉以河北道行臺尚書令
并州總管廣○宋為雍州牧餘官如故兵部尚書楊尚希為禮部
尚書癸丑置山南道行臺尚書省於襄州以秦王俊為尚書令景
辰以芳州刺史駱平難為疊州刺史衡州總管周法尚為黃州總
管甲子甘露降于華林園

皇朝虞本作
改之晉書
惟亦本是
惟也

七年春正月癸巳有事于太廟乙未制諸州歲貢三人二月丁巳
祀朝日于東部巳巳陳遣兼散騎常侍王亨兼通直散騎常侍王
脊來聘壬申車駕幸醴泉宮是月癸丁男十萬餘修築長城二旬
而罷夏四月巳酉幸晉王第庚戌於揚州開山陽瀆以通運漕突
厥沙鉢略可汗卒其子雍虞閭嗣立是為都藍可汗癸亥頒青龍
符於東方總管刺史西方以騶虞南方以朱雀北方以玄武甲戌
遣兼散騎常侍楊同兼通直散騎常侍崔儵使于陳以民部尚書
蘇威為吏部尚書五月乙亥朔日有蝕之巳卯雨石於武安滏陽
間十餘里秋七月巳丑衛王爽薨上發喪於門下外省八月景午
以懷州刺史源雄為朔州總管庚申梁主蕭琮來朝九月乙酉梁
安平王蕭巖掠於其國以奔陳辛卯廢梁國曲赦江陵以梁主蕭
琮為柱國封莒國公冬十月庚申行幸同州以先帝所居隆因徒
老對詔失旨上天怒免其職官而去戊戌至白馬

雅良由仕宦之鄉陶染成俗也十一月甲午幸

此間人物衣冠

老對詔失旨上天怒免其職官而去戊戌至白馬

隋書卷二

帝紀第二

高祖下

特進臣魏徵上

西華中書

八年春正月乙亥陳遣散騎常侍表雅兼通直散騎常侍周止水
 來聘二月庚子鎮星入東井辛酉陳人寇硤州三月辛未上柱國
 隴西郡公李詢卒壬申以成州刺史姜須達為會州總管甲戌遣
 兼散騎常侍程尚賢兼通直散騎常侍韋暉使于陳戊寅詔曰昔
 有苗不賓唐堯薄伐孫皓僭虐晉武行誅有陳竊據江表逆天暴
 物朕初受命陳頊尚存思欲教之以道不以龔行為令往來脩睦
 望其遷善時日無幾疊惡已聞厚納叛亡侵犯城戍勾吳閩越肆
 厥殘忍于時王師大舉將一車書陳頊反地收兵深懷震懼責躬
 請約俄而致殞矜其喪禍仍詔班師叔寶承風因求繼好載佇克

念共敦行李每見珪璫入朝輜軒出使何嘗不殷勤曉諭戒以惟
新而狠子之心出而彌野威侮五行怠棄三正誅翦骨肉夷滅才
良據手掌之地恣溪壑之險劫奪閭閻資產俱竭驅蹙內外勞役
弗已徵責女子擅造宮室日增月益止足無期帷薄嬪嬙有踰萬
數寶衣玉食窮奢極侈淫聲樂飲俾晝作夜斬直言之客滅無罪
之家剖人之肝分人之血欺天造惡祭鬼求恩歌僊衢路酣醉官
闈盛粉黛而執干戈曳羅綺而呼警蹕躍馬振策從旦至昏無所
經營馳走不息負甲持仗隨逐徒行追而不及卽加罪譴自古昏
亂罕或能比介士武夫饑寒力役筋髓罄於土木性命俟於溝渠
君子潛逃小人得志家家隱殺戮各各任聚斂天災地孽物怪人
妖衣冠鉗口道路以目傾心翹足誓告於我日月以冀文奏相尋
重以背德違言搖蕩疆場巴峽之下海滙已西江北江南爲鬼爲
魅死隴窮發掘之酷生居極攘效之苦抄掠人畜斷截樵蘇市井
不立農事廢寢歷陽廣陵窺覲相繼或謀圖城邑或劫剝吏人晝
伏夜遊鼠竄狗盜彼則羸兵敝卒來必就擒此則重門設險有勞
藩捍天之所覆無非朕臣每關聽覽有懷傷惻有梁之國我南藩
也其君入朝潛相招誘不顧朕恩士女深迫勝之悲城府致空虛
之歎非直朕居人上懷此無忘旣而百辟屢以爲言兆庶不堪其
請豈容對而不誅忍而不救近日秋始謀欲弔人並部樓船盡令
東驚便有神龍數十騰躍江流引伐罪之師向金陵之路船住則
龍止船行則龍去四日之內三軍皆覩豈非蒼旻愛人幽明展事
降神先路協贊軍威以上天之靈助戡定之方便可出師授律應
機誅殄在斯舉也永清吳越其將士糧仗水陸資須期會進止一
准別敕秋八月丁未河北諸州饑遣吏部尚書蘇威振恤之九月

丁丑宴南征諸將頒賜各有差癸巳嘉州言龍見冬十月巳亥太白出西方巳未置淮南行臺省於壽春以晉王廣○宋本諱為尚書令辛酉陳遣兼散騎常侍王琬兼通直散騎常侍許善心來聘拘留不遣甲子將伐陳有事於太廟命晉王廣○宋本諱秦王俊清河公楊素並為行軍元帥以伐陳於是晉王廣○宋本諱出六合秦王俊出襄陽清河公楊素出信州荊州刺史劉仁恩出江陵宜陽公王世積出蕪春新義公韓擒維本多虎字後同出廬江襄邑公賀若弼出吳州落叢公燕榮出東海合總管九十兵五十一萬八千皆受晉王節度東接滄海西拒巴蜀旌旗舟楫橫亘數千里曲赦陳國有星孛於牽牛十一月丁卯車駕餞師詔購陳叔寶位上柱國萬戶公乙亥行幸定城陳師誓衆景子幸河東十二月庚子至自河東九年春正月巳巳白虹夾日辛未賀若弼拔陳京口韓擒拔陳南

豫州癸酉以尚書右僕射虞慶則為右衛大將軍景子賀若弼敗陳師於蔣山獲其將蕭摩訶韓擒進師入建鄴獲其將任蠻奴獲陳主叔寶陳國平合州三十郡一百縣四百癸巳遣使持節巡撫之二月乙未廢淮南行臺省景申制五百家為鄉正一人百家為里長一人丁酉以襄州總管韋世康為安州總管夏四月巳亥幸驪山親勞旋師乙巳三軍凱入獻俘於太廟拜晉王廣○宋本諱為太尉庚戌上御廣陽門宴將士頒賜各有差辛亥大赦天下巳未以陳都官尚書孔範散騎常侍王嗟王儀御史中丞沈觀等邪佞於其主以致亡滅皆投之邊裔辛酉以信州總管楊素為荊州總管吏部侍郎宇文弼為刑部尚書宗正少卿楊昇為工部尚書壬戌詔曰往以吳越之野羣黎塗炭干戈方用積習未寧今率土大同含生遂性太平之法方可流行凡我臣僚澡身浴德開通耳目宜

從茲始喪亂已來緬將十載君無君德臣失臣道父有不慈子有不孝兄弟之情或薄夫婦之義或違長幼失序尊卑錯亂朕爲帝王志存愛養時有臻道不敢寧息內外職位遐邇黎人家家自修人人克念使不軌不法蕩然俱盡兵可立威不可不戢刑可助化不可專行禁衛九重之餘鎮守四方之外戎旅軍器皆宜停罷伐路旣夷羣方無事武力之子俱可學文人間甲仗悉皆除毀有功之臣降情文藝家門子姪各守一經令海內翕然高山仰止京邑庠序爰及州縣生徒受業升進於朝未有灼然明經高第此則教訓不篤考課未精明勒所由隆茲儒訓官府從宦丘園素士心迹相表寬弘爲念勿爲踟促乖我皇猷朕君臨區宇於茲九載開直言之路披不諱之心形於顏色勞於興寢自頃寔藝論功昌言乃衆推誠切諫其事甚疎公卿士庶非所望也各啟至誠匡茲不逮

見善必進有才必舉無或噤嘿退有後言頒告天下咸悉此意閏月甲子以安州總管韋世康爲信州總管丁丑頒木魚符於總管刺史雌一雄一巳卯以吏部尚書蘇威爲尚書右僕射六月乙丑以荊州總管楊素爲納言丁丑以吏部侍郎盧愷爲禮部尚書時朝野物議咸願登封秋七月景午詔曰豈可命一將軍除一小國遐邇注意便謂太平以薄德而封名山用虛言而干上帝非朕攸聞而今以後言及封禪宜卽禁絕八月壬戌以廣平王雄爲司空冬十一月壬辰考使定州刺史豆盧通等上表請封禪上不許庚子以右衛大將軍虞慶則爲右武侯大將軍右領軍將軍李安爲右領軍大將軍甲寅降囚徒十二月甲子詔曰朕祇承天命清蕩萬方百王衰敝之後兆庶澆浮之日聖人遺訓掃地俱盡制禮作樂今也其時朕情存古樂深思雅道鄭衛淫聲魚龍雜戲樂府之

內盡以除之今欲更調律呂改張琴瑟且妙術精微非因教習工人代掌止傳糟粕不足達神明之德論天地之和區域之間奇才異藝天知神授何代無哉蓋晦迹於非時俟昌言於所好宜可搜訪速以奏聞庶覩一藝之能共就九成之業仍詔太常牛弘通直散騎常侍許善心祕書丞姚察通直郎虞世基等議定作樂已巳以黃州總管周法尚爲永州總管

十年春正月乙未以皇孫昭爲河南王楷爲華陽王二月庚申幸并州夏四月辛酉至自并州五月乙未詔曰魏末喪亂寓縣瓜分役車歲動未遑休息兵士軍人權置坊府南征北伐居處無定家無完堵地罕包桑恒爲流寓之人竟無鄉里之號朕甚愍之凡是軍人可悉屬州縣墾田籍帳一與民同軍府統領宜依舊式罷山東河南及北方緣邊之地新置軍府六月辛酉制人年五十免役

收庸癸亥以靈州總管王世積爲荊州總管浙江刺史元胄爲靈

州總管秋七月癸卯以納言楊素爲內史令庚戌上親錄囚徒辛

亥高麗遼東郡公高陽卒壬子吐谷渾遣使來朝八月壬申遣柱

國襄陽郡公韋洸上開府東萊郡公王景並持節巡撫嶺南百越

皆服冬十月甲子頒木魚符於京口宋本闕一有師字官五品已上戊辰以永

州總管周法尚爲桂州總管十一月辛卯幸國學頒賜各有差景

午契丹遣使朝貢辛丑有事於南郊是月婺州人汪文進會稽人

高智慧蘇州人沈玄愴皆舉兵反自稱天子署置百官樂安蔡道

人蔣山李稜饒州吳代華永嘉沈孝徹泉州王國慶餘杭楊寶英

交趾李春等皆自稱大都督攻陷州縣詔上柱國內史令越國公

楊素討平之

十一年春正月丁酉以平陳所得古器多爲妖變悉命毀之辛丑

高麗遣使朝貢景午皇太子妃元氏薨上舉哀於文思殿二月戊午吐谷渾遣使貢方物以大將軍蘇孝慈爲工部尚書景子以臨頴令劉曠治術尤異擢爲莒州刺史己卯突厥遣使獻七寶盃辛巳晦日有蝕之三月壬午遣通事舍人若干洽使于吐谷渾癸未以幽州總管周搖爲壽州總管朔州總管吐萬緒爲夏州總管夏四月戊午突厥雍虞閭可汗遣其特勒來朝五月甲子高麗遣使貢方物癸卯詔百官悉詣朝堂上封事乙巳以左衛將軍元旻爲左衛大將軍秋七月己丑以柱國杜彥爲洪州總管八月壬申幸栗園滕王瓚薨乙亥至自栗園上柱國沛國公鄭譯卒十二月景辰靺鞨遣使貢方物

十二年春正月壬子以蘇州刺史皇甫績爲信州總管宣州刺史席代雅爲廣州總管二月己巳以蜀王秀爲內史令兼右領軍大將軍漢王諒爲雍州牧右衛大將軍夏四月辛卯以壽州總管周搖爲襄州總管五月辛亥廣州總管席代雅卒秋七月乙巳尚書右僕射邳國公蘇威禮部尚書容城縣侯盧愷並坐事除名壬戌幸昆明池其日還宮己巳有事於太廟壬申晦日有蝕之八月甲戌制天下死罪諸州不得便決皆令大理覆治乙亥幸龍首池癸巳制宿衛者不得輒離所守丁酉上柱國夏州總管楚國公豆盧勣卒戊戌上親錄囚徒九月丁未以工部尚書楊异爲吳州總管冬十月丁丑以遂安王集爲衛王壬午有事於太廟至太祖神主前上流涕嗚咽悲不自勝十一月辛亥有事於南郊壬子宴百寮頒賜各有差己未上柱國新義郡公韓擒卒庚申以豫州刺史權武爲潭州總管甲子百寮大射於武德殿十二月癸酉突厥遣使來朝乙酉以上柱國內史令楊素爲尚書右僕射己酉吐谷渾靺

鞞並遣使貢方物

十三年春正月乙巳上柱國郇國公韓達業卒景午契丹奚霫室
韋並遣使貢方物壬子親祀感帝癸巳以信州總管韋世康爲吏
部尚書壬戌行幸岐州二月景子詔營仁壽宮丁亥至自岐州戊
子宴考使於嘉則殿巳卯立皇孫陳爲豫章王戊子晉州刺史南
陽郡公賈悉達隰州總管撫寧郡公韓延等以賄伏誅巳丑制坐
事去官者配流一年丁酉制私家不得隱藏緯候圖讖夏四月癸
未制戰亡之家給復一年五月癸亥詔人間有撰集國史臧不人
物者皆令禁絕秋七月戊申鞞遣使貢方物壬子左衛大將軍
雲州總管鉅鹿郡公賀婁子幹卒丁巳幸昆明池戊辰晦日有蝕
之九月景辰降囚徒庚申以郇國公楊綸爲滕王乙丑以柱國杜
彥爲雲州總管冬十月乙卯上柱國華陽郡公梁彥先卒

十四年夏四月乙丑詔曰在昔聖人作樂崇德移風易俗於斯爲
大自晉氏播遷兵戈不息雅樂流散年代已多四方未一無由辨
正賴上天鑒臨明神降福拯茲塗炭安息蒼生天下大同歸於治
理遺文舊物皆爲國有比命所司總令研究正樂雅聲詳考已訖
宜卽施用見行者停人間音樂流僻日久棄其舊體競造繁聲浮
宕不歸遂以成俗宜加禁約務存其本五月辛酉京師地震關內
諸州旱六月丁卯詔省府州縣皆給公廨田不得治生與人爭利
秋七月乙未以郇國公蘇威爲納言八月辛未關中大旱人饑上
率戶口就食於洛陽九月巳未以齊州刺史樊子蓋爲循州總管
丁巳以基州刺史崔仲方爲會州總管冬閏十月甲寅詔曰齊梁
陳往皆創業一方綿歷年代旣宗祀廢絕祭奠無主與言矜念良
以愴然莒國公蕭琮及高仁英陳叔寶等宜令以時脩其祭祀所

須器物有司給之乙卯制外官九品已上父母及子年十五已上不得將之官十一月壬戌制州縣佐吏三年一代不得重任癸未

有星孛於角亢十二月乙未東巡狩

十五年春正月壬戌車駕次齊州親問疾苦景寅旅王符山庚午

上以歲旱祠太山以謝愆咎大赦天下二月景辰收天下兵器敢

有私造者坐之關中緣邊不在其例丁巳上在國蔣國公梁睿卒

三月己未至自東巡狩望祭五嶽海瀆丁亥幸仁壽宮營州總管

韋藝卒夏四月己丑朔大赦天下甲辰以趙州刺史楊達爲工部

尚書丁未以開府儀同三司韋沖爲營州總管五月癸酉吐谷渾

遣使朝貢丁亥制京官五品已上佩銅魚符六月戊子詔鑿底柱

庚寅相州刺史豆盧通貢綾文布命焚之於朝堂乙未林邑遣使

來貢方物辛丑詔名山大川未祀典者悉祠之秋七月乙丑晉

王廣獻毛龜甲戌遣邳國公蘇威巡省江南戊寅至自仁壽宮辛

巳制九品已上官以理去職者聽並執笏冬十月戊子以吏部尚

書韋世康爲荊州總管十一月辛酉幸溫湯乙丑至自溫湯十二

月戊子敕盜邊糧一升已上皆斬並籍沒其家己丑詔文武官以

四考交代

十六年春正月丁亥以皇孫裕爲平原王筠爲安成王嶷爲安平

王恪爲襄城王該爲高陽王韶爲建安王暉爲潁川王夏五月丁

巳以懷州刺史龐晃爲夏州總管慈陽縣公姚辯爲靈州總管六

月甲午制工商不得進仕并州大蝗辛丑詔九品已上妻五品已

上妾夫亡不得改嫁秋八月景戌詔決死罪者三奏而後行刑冬

十月己丑幸長春宮十一月壬子至自長春宮

十七年春二月癸未太平公史萬歲擊西寧羌平之庚寅幸仁壽

宮庚子上柱國王世積討桂州賊李光仕平之壬寅河東王昭納
妃宴羣臣頒賜各有差三月景辰詔曰分職設官共理時務班位
高下各有等差若所在官人不相敬憚多自寬縱事難克舉諸有
殿失雖備科條或據律乃輕論情則重不卽決罪無以懲肅其諸
司論屬官若有愆犯聽於律外斟酌決杖辛酉上親錄囚徒癸亥
上柱國彭國公劉昶以罪伏誅庚午遣治書侍御史柳或皇甫誕
巡省河南河北夏四月戊寅頒新曆壬午詔曰周曆告終羣凶作
亂豐起蕃服毒被生人朕受命上玄廓清區宇聖靈垂祐文武同
心申明公穆鄖襄公孝寬廣平王雄蔣國公睿楚國公勣齊國公
頰越國公素魯國公慶則新寧公長文宜陽公世積趙國公羅雲
隴西公詢廣業公景真昌公振沛國公譚項城公子相鉅鹿公子
幹等登庸納揆之時草昧經綸之日丹誠大節心盡帝圖茂績殊

勲力宜王府宜弘其門緒與國同休其世子世孫未經州任者宜
量才升用庶享榮位世祿無窮五月宴百寮於玉女泉班賜各有
差己巳蜀王秀來朝高麗遣使貢方物甲戌以左衛將軍獨孤羅
雲爲涼州總管閏月己卯羣鹿入殿門馴擾侍衛之內秋七月丁
丑桂州人李代賢反遣右武侯大將軍虞慶則討平之丁亥上柱
國并州總管秦王俊坐事免以王就第戊戌突厥遣使貢方物八
月丁卯荊州總管上庸郡公韋世康卒九月甲申至自仁壽宮庚
寅上謂侍臣曰禮主於敬皆當盡心黍稷非馨貴在祗肅廟庭設
樂本以迎神齋祭之日觸目多感當此之際何可爲心在路奏樂
禮未爲允羣公卿士宜更詳之冬十月丁未頒銅獸符於驃騎車
騎府戊申道王靜薨庚申詔曰五帝異樂三王殊禮皆隨事而有
損益因情而立節文仰惟祭享宗廟瞻敬如在罔極之感情深茲

日而禮畢升路鼓吹發音還入宮門金石振響斯則哀樂同日心事相違情所不安理實未允宜改茲往式用弘禮教自今已後享廟日不須備鼓吹殿庭勿設樂懸辛未京師大索十一月丁亥突厥遣使來朝十二月壬子上柱國右武侯大將軍魯國公虞慶則以罪伏誅

十八年春正月辛丑詔曰吳越之人往承敝俗所在之處私造大船因相聚結致有侵害其江南諸州人間有船長三丈已上悉括入官二月甲辰幸仁壽宮乙巳以漢王諒為行軍元帥水陸三十萬伐高麗三月乙亥以柱國杜彥為朔州總管夏四月癸卯以蔣州刺史郭衍為洪州總管五月辛亥詔畜猫鬼蠱毒厥魅野道之家投於四裔六月景寅下詔黜高麗王高元官爵秋七月壬申詔以河南八州水免其課一作科役景季詔京官五品已上總管刺史以志

行修謹清平幹濟二科舉人九月己丑漢王諒師遇疾疫而旋死者十八九庚寅敕舍客無公驗者坐及刺史縣令辛卯至自仁壽宮冬十一月甲戌上親錄囚徒癸未有事於南郊十二月庚子上柱國夏州總管任城郡公王景以罪伏誅是月自京師至仁壽宮置行宮十有二所

十九年春正月癸酉大赦天下戊寅大射武德殿宴賜百官二月己亥晉王廣宗來朝辛丑以并州總管長史宇文弼為朔州總管甲寅幸仁壽宮夏四月丁酉突厥利可汗內附達頭可汗犯塞遣行軍總管史萬歲擊破之六月丁酉以豫章王暕為內史令秋八月癸卯上柱國尚書左僕射齊國公高顛坐事免辛亥上柱國皖城郡公張威卒甲寅上柱國城陽郡公李徹卒九月乙丑以太常卿牛弘為吏部尚書冬十月甲午以突厥利可汗為啟人可汗築大

利城處其部落庚子以朔州總管宇文弼爲代州總管十二月乙未突厥都藍可汗爲部下所殺丁丑星實于勃海

二十年春正月辛酉朔上在仁壽宮突厥高麗契丹並遣使貢方

物癸亥以代州總管宇文弼爲吳州總管二月己巳以上柱國崔

弘度爲原州總管丁丑無雲而雷三月辛卯熙州人李英林反遣

行軍總管張衡討平之夏四月壬戌突厥犯塞以晉王廣爲行軍

元帥擊破之乙亥天有聲如瀉水自南而北六月丁丑秦王俊薨

秋八月老人星見九月丁未至自仁壽宮癸丑吳州總管楊昇卒

冬十月己未太白晝見乙丑皇太子勇及諸子並廢爲庶人殺柱

國太平縣公史萬歲己巳殺左衛大將軍五原郡公元旻十一月

戊子天下地震京師大風雪以晉王廣爲皇太子十二月戊午詔

東宮官屬不得稱臣於皇太子辛巳詔曰佛法深妙道教虛融咸

降大慈濟度羣品凡在舍識皆蒙覆護所以雕鑄靈相圖寫真形

率土瞻仰用申誠敬其五嶽四鎮節宣雲雨江河淮海浸潤區域

並生養萬物利益兆人故建廟立祀以時恭敬敢有毀壞偷盜佛

及天尊像嶽鎮海瀆神形者以不道論沙門壞佛像道士壞天尊

者以惡逆論

仁壽元年春正月乙酉朔大赦改元以尚書右僕射楊素爲尚書

左僕射納言蘇威爲尚書右僕射丁酉徙河南王昭爲晉王突厥

寇恒安遣柱國韓洪擊之官軍敗績以晉王昭爲內史令辛丑詔

曰君子立身雖云百行唯誠與孝最爲其首故投主殉節自古稱

難殞身王事禮加二等而代俗之徒不達大義至於致命戎旅不

入兆域虧孝子之意傷人臣之心興言念此每深愍歎且入廟祭

祀並不廢闕何止墳塋獨在其外自今已後戰亡之徒宜入墓域

二月乙卯朔日有蝕之辛巳以上柱國獨孤楷爲原州總管三月
壬辰以豫章王暕爲揚州總管夏四月以浙州刺史蘇孝慈爲洪
州總管五月己丑突厥男女九萬口來降壬辰驟雨震雷大風拔
木宜君湫水移於始平六月癸丑洪州總管蘇孝慈卒己卯遣十
六使巡省風俗乙丑詔曰儒學之道訓教生人識父子君臣之義
知尊卑長幼之序升之於朝任之以職故能贊理時務弘益風範
朕撫臨天下思弘德教延集學徒崇庠序開進仕之路佇賢雋
之人而國學胄子垂將千數州縣諸生成亦不少徒有名錄空度
歲時未有德爲代範才任國用良由設學之理多而未精今宜簡
省明加獎勵於是國子學唯留學生七十人太學四門及州縣學
並廢其日頒舍利於諸州秋七月戊戌改國子爲太學九月癸未
以柱國杜彥爲雲州總管十一月己丑有事於南郊壬辰以資州
刺史衛玄爲遂州總管

二年春二月辛亥以邢州刺史侯莫陳穎爲桂州總管宗正楊祀
爲荊州總管三月己亥幸仁壽宮壬寅以齊州刺史張喬爲潭州
總管夏四月庚戌歧雍二州地震秋七月丙戌詔內外官各舉所
知戊子以原州總管獨孤楷爲益州總管八月己巳皇后獨孤氏
崩九月景戌至自仁壽宮壬辰河南北諸州大水遣工部尚書楊
達振恤之乙未上柱國襄州總管金水部公周搖卒隴西地震冬
十月壬子曲赦益州管內癸丑以工部尚書楊達爲納言閏月甲
申詔尚書左僕射楊素與諸術者刑定陰陽舛謬己丑詔曰禮之
爲用時義大矣黃琮蒼璧降天地之神粢盛牲食展宗廟之敬正
父子君臣之序明昏姻喪紀之節故道德仁義非禮不成安上治
人莫善於禮自區宇亂離綿歷年代王道衰而變風作微言絕而

大義乖與代推移其弊日甚至於四時郊祀之節文五服麻葛之隆殺是非異說踏駁殊塗致使聖教彫訛輕重無准朕祇承天命撫臨生人當洗滌之時屬干戈之代克定禍亂先運武功刪正彝典日不暇給今四海乂安五戎勿用理宜弘風訓俗導德齊禮綴往聖之舊章興先王之茂則尚書左僕射越國公楊素尚書右僕射邳國公蘇威吏部尚書奇章公牛弘內史侍郎薛道衡祕書丞許善心內史舍人虞世基著作郎王劭或任居端揆博達古今或器推令望學綜經史委以裁緝實允僉議可並修定五禮壬申葬獻皇后於大陵十二月癸巳上在國益州總管蜀王秀廢爲庶人交州人李佛子舉兵反遣行軍總管劉方討平之

三年春二月己卯原州總管比陽縣公龐晃卒戊子以大將軍蔡陽郡公姚辯爲左武侯大將軍夏五月癸卯詔曰哀哀父母生我

劬勞欲報之德昊天罔極但風樹不靜嚴敬莫追霜露旣降感思空切六月十三日是朕生日宜令海內爲武元皇帝元明皇后斷屠六月甲午詔曰禮云至親以朞斷蓋以四時之變易萬物之更始故聖人象之其有三年加隆爾也但家無二尊母爲厭降是以父存喪母還服於朞者服之正也豈容朞內而更小祥然三年之喪而有小祥者禮云朞祭禮也朞而除喪道也以是之故雖未再朞而天地一變不可不祭不可不除故有練焉以存喪祭之本然朞喪有練於理未安雖云十一月而練乃無所法象非朞非時豈可除祭而儒者徒擬三年之喪立練禫之節可謂苟存其變而失其本欲漸於奪乃薄於喪致使子則冠練去經黃裏縗緣經則布葛在躬麤服未改豈非經哀尚存子情已奪親疎失倫輕重顛倒乃不順人情豈聖人之意也故知先聖之禮廢於人邪三年之喪

尚有不行之者至於祥練之節安能不墜者乎禮云父母之喪無
貴賤一也而大夫士之喪父母乃貴賤異服然則禮壞樂崩由來
漸矣所以晏平仲之斬麤練其老謂之非禮滕文公之服三年其
臣咸所不欲蓋由王道既衰諸侯異政將踰越於法度惡禮制之
害已乃滅去篇籍自制其宜遂至骨肉之恩輕重從俗無易之道
隆殺任情況孔子沒而微言絕秦滅學而經籍焚者乎有漢之興
雖求儒雅人皆異說義非一貫又近代亂離唯務兵革其於典禮
時所未遑夫禮不從天降不從地出乃人心而已者謂情緣於恩
也故恩厚者其禮隆情輕者其禮殺聖人以是稱情立文別親疎
貴賤之等自臣子道消上下失叙莫大之恩逐情而薄莫重之禮
與時而殺此乃服不稱喪容不稱服非所謂聖人緣恩表情制禮
之義也然喪與易也寧在於戚則禮之本也禮有其餘未若於哀
則情之實也今十一月而練者非禮之本非情之實由是言之父
存喪母不宜有練但依禮十二月而祥中月而禫庶以合聖人之
意達孝子之心秋七月丁卯詔曰日往月來唯天所以運序山鎮
川流唯地所以宣氣運序則寒暑無差宣氣則雲雨有作故能成
天地之大德育萬物而爲功況一人君子四海睹物欲運獨見致
治不藉羣才未之有也是以唐堯欽明命羲和以居岳虞舜睿德
升元凱而作相伊尹鼎俎之勝爲殷之阿衡呂望漁釣之夫爲周
之尚父此則鳴鶴在陰其子必和風雲之從龍虎賢哲之應聖明
君德不回臣道以正故能通天地之和順陰陽之序豈不由元首
而有股肱乎自王道衰人風薄居上莫能公道以御物爲下必踵
私法以希時上下相蒙君臣義失義失則政乖政乖則人困蓋同
德之風難嗣離德之軌易追則任者不休休者不任則衆口鑠金

戮辱之禍不測是以行歌避代辭位灌園卷而可懷黜而無愠放
逐江湖之上沈赴河海之流所以自潔而不悔者也至於閭閻秀
異之士鄉曲博雅之儒言足以佐時行足以勵俗遺棄於草野堙
滅而無聞豈勝道哉所以覽古而歎息者也今方區宇一家烟火
萬里百姓乂安四夷賓服豈是人功實乃天意朕惟夙夜祇懼將
所以上嗣明靈是以小心勵已日慎一日以黎元在念憂兆庶未
康以庶政爲懷慮一物失所雖求傅巖莫見幽人徒想崆峒未聞
至道唯恐商歌於長夜抱關於夷門遠跡犬羊之間屈身僮僕之
伍其令州縣搜揚賢哲皆取明知今古通識治亂究政教之本達
禮樂之源不限多少不得不舉限以三旬咸令進路徵召將送必
須以禮八月壬申上柱國檢校幽州總管落叢郡公燕榮以罪伏
誅九月壬戌置常平官甲子以營州總管韋冲爲民部尚書十二

月癸酉河南諸州水遣納言楊達振恤之

四年春正月景辰大赦甲子幸仁壽宮乙丑詔賞罰支度事無巨
細並付皇太子夏四月乙卯上不豫六月庚申大赦天下有星入
月中數日而退長人見於雁門秋七月乙未日青無光八日乃復
已亥以大將軍段文振爲雲州總管甲辰上以疾甚臥於仁壽宮
與百寮辭訣並握手歔歔丁未崩於大寶殿時年六十四遺詔曰
嗟乎自昔晉室播遷天下喪亂四海不一以至周齊戰爭相尋年
將三百故割疆土者非一所稱帝王者非一人書軌不同生人塗
炭上天降鑿爰命於朕用登大位豈關人力故得撥亂反正偃武
修文天下大同聲教遠被此又是天意欲寧區夏所以昧旦臨朝
不敢逸豫一日萬機留心親覽晦明寒暑不憚劬勞匪曰朕日蓋
爲百姓故也王公卿士每日闕庭刺史以下三時朝集何嘗不聲

竭心府誠敷殷勤義乃君臣情兼父子庶藉百寮智力萬國歡心
欲令率土之人永得安樂不謂遘疾彌留至於大漸此乃人生常
分何足言及但四海百姓衣食不豐教化刑政猶未盡善與言念
此唯以留恨朕今年踰六十不復稱天但筋力精神一時勞竭如
此之事本非爲身止欲安養百姓所以致此人生子孫誰不愛念
既爲天下事須割情勇及秀等並懷悖惡既知無臣子之心所以
廢黜古人有言知臣莫若于君知子莫若于父若令勇秀得志共
治國家必當戮辱徧於公卿酷毒流於人庶今惡子孫已爲百姓
黜屏好子孫足堪負荷大業此雖朕家事理不容隱前對文武侍
衛具已論述皇太子廣○宋
不諱地居上嗣仁孝著聞以其行業堪成朕志
但令內外羣官同心戮力以此共治天下朕雖瞑目何所復恨但
國家事大不可限以常禮既葬公除行之自昔今宜遵用不勞改

定凶禮所須纔令周事務從節儉不得勞人諸州總管刺史已下
宜各率其職不須奔赴自古哲王因人作法前帝後帝沿革隨時
律令格式或有不便於事者宜依前敕修改務當政要嗚呼敬之
哉無墜朕命乙卯癸喪河間楊柳四株無故黃落既而花葉復生
八月丁卯梓宮至自仁壽宮景子殯于大興前殿冬十月己卯合
葬於太陵同墳而異穴上性嚴重有威容外質木而內明敏有大
略初得政之始羣情不附諸子幼弱內有六王之謀外致三方之
亂握強兵居重鎮者皆周之舊臣上推以赤心各展其用不踰其
月克定二邊未及十年平一四海薄賦斂輕刑罰內修制度外撫
戎夷每日聽朝日昃忘倦居處服翫務存節儉令行禁止上下化
之開皇仁壽之間丈夫不衣綾綺而無金玉之飾常服率多布帛
裝帶不過以銅鐵骨角而已雖嗇於財至於賞賜有功亦無所愛

慘乘輿四出路逢上表者則駐馬親自臨問或潛遣行人採聽風俗吏治得失人間疾苦無不留意嘗遇關中饑遣左右視百姓所食有得豆屑雜糠而奏之者上流涕以示羣臣深自咎責爲之徹膳不御酒肉者始將一朞及東拜太山關中戶口就食洛陽者道路相屬上敕斥堠不得輒有驅逼男女參廁於仗衛之間逢扶老攜幼者輒引馬避之慰勉而去至艱險之處見負擔者據令左右扶助之其有將士戰沒必加優賞仍令使者就加勞問自強不息朝夕孜孜人庶殷繁帑藏充實雖未能臻於至治亦足稱近代之良主然天性沉猜素無學術好爲小數不達大體故忠臣義士莫得盡心竭辭其草創元勲及有功諸將誅夷罪退罕有存者又不悅詩書廢除學校唯婦言是用廢黜諸子逮于暮年持法尤峻喜怒不常過於殺戮嘗令左右送西域朝貢使出玉門關其所經之處或受牧宰小物饋遺鸚鵡麋皮馬鞭之屬上聞而大怒又詣武庫見署中蕪穢不治於是執武庫令及諸受遺者出開遠門外親自臨決死者數十人又徃徃潛令人賂遺令史府史有受者必死無所寬貸議者以此少之

史臣曰高祖龍德在田奇表見異晦明藏用故知我者希始以外戚之尊受託孤之任與能之議未爲當時所許是以周室舊臣咸懷憤惋旣而王謙固三蜀之阻不踰朞月尉迴舉全齊之衆一戰而亡斯乃非止人謀抑亦天之所贊也乘茲機運遂遷周鼎于時蠻夷猾夏荆楊未一劬勞日昊經營四方樓船南邁則金陵失險驃騎北指則單于款塞職方所載並入疆理禹貢所圖咸受正朔雖晉武之克平吳會漢宣之推亡固存比義論功不能尚也七德旣敷九歌已洽要荒咸暨尉候無警於是躬節儉平徭賦倉廩實

法令行君子咸樂其生小人各安其業強無陵弱衆不暴寡人物
殷阜朝野歡娛二十年間天下無事區宇之內晏如也考之前王
足以參蹤盛烈但素無術學不能盡下無寬仁之度有刻薄之資
暨乎暮年此風逾扇又雅好符瑞暗於大道建彼維城權侔京室
皆同帝制靡所適從聽哲婦之言惑邪臣之說溺寵廢嫡託付失
所滅父子之道開昆弟之隙縱其尋斧翦伐本枝墳土未乾子孫
繼踵屠戮松檟纒列天下已非陪有惜哉迹其衰怠之源稽其亂
亡之兆起自高祖成於煬帝所由來遠矣非一朝一夕其不祀忽
諸未爲不幸也

隋書卷二

帝紀第三

煬帝上

特進臣魏徵上

魏徵

煬皇帝諱廣一名英小字阿摩高祖第二子也母曰文獻獨孤皇
后上美姿儀少敏慧高祖及后於諸子中特所鍾愛在周以高祖
勲封雁門郡公開皇元年立爲晉王拜柱國并州總管時年十三
尋授武衛大將軍進位上柱國河北道行臺尚書令大將軍如故
高祖令項城公歆安道公才李徹輔導之上好學善屬文沉深嚴
重朝野屬望高祖密令善相者來和徧視諸子和曰晉王眉上雙
骨隆起貴不可言旣而高祖幸上所居第見樂器絃多斷絕又有
塵埃若不用者以爲不好聲妓善之上亦自矯飾當時稱爲仁孝
嘗觀獵遇雨左右進油衣上曰士卒皆霑濕我獨衣此乎乃令持

去六年轉淮南道行臺尚書令其年徵拜雍州牧內史令八年冬大舉伐陳以上爲行軍元帥及陳平執陳湘州刺史施文慶散騎常侍沈客卿市令楊慧朗刑法監徐析尚書都令史暨慧以其邪佞有害於民斬之右闕下以謝三吳於是封府庫資財無所取天下稱賢進位太尉賜輅車乘馬袞冕之服玄珪白璧各一復拜并州總管俄而江南高智慧等相聚作亂徙上爲揚州總管鎮江都每歲一朝高祖之祠太山也領武侯大將軍明年歸藩後數載突厥寇邊復爲行軍元帥出靈武無虜而還及太子勇廢立上爲皇太子是月當受冊高祖曰吾以大興公成帝業令上出舍大興縣其夜烈風大雪地震山崩民舍多壞壓死者百餘口仁壽初奉詔巡撫東南是後高祖每避暑仁壽宮恒令上監國四年七月高祖崩上卽皇帝位於仁壽宮八月奉梓宮還京師并州總管漢王諒

舉兵反詔尚書左僕射楊素討平之九月乙巳以備身將軍崔彭爲左領軍大將軍十一月乙未幸洛陽景申癸丁男數十萬掘塹自龍門東接長平汲郡抵臨清關度河至浚儀襄城達於上洛以置關防癸丑詔曰乾道變化陰陽所以消息泐創不同生靈所以順叙若使天意不變施化何以成四時人事不易爲政何以釐萬姓易不云乎通其變使民不倦變則通通則久有德則可以有功則可大朕又聞之安安而能遷民用不變是故姬邑兩周如武王之意殷人五徙成湯后之業若不因人順天功業見乎變愛人治國者可不謂歟然雒邑自古之都王畿之內天地之所合陰陽之所和控以二河固以四塞水陸通貢賦等故漢祖曰吾行天下多矣唯見雒陽自古皇王何嘗不留意所不都者蓋有由焉或以九州未一或以困其府庫作雒之制所以未暇也我有隋之始便欲

創茲懷維日復一日越暨于今念茲在茲興言感哽朕肅膺寶曆
纂臨萬邦遵而不失心奉先志今者漢王諒悖逆毒被山東遂使
州縣或淪非所此由關河懸遠兵不赴急加以并州移戶復在河
南周遷殷人意在於此况復南服遐遠東夏殷大因機順動今也
其時羣司百辟僉諧厥議但成周墟堵弗堪葺宇今可於伊維營
建東京便卽設官分職以爲民極也夫宮室之制本以便生上棟
下宇足避風露高臺廣廈豈曰適形故傳云儉德之共侈惡之大
宜尼有云與其不遜也寧儉豈謂瑤臺瓊室方爲宮殿者乎土堦
采椽而非帝王者乎是知非天下以奉一人乃一人以主天下也
民惟國本本固邦寧百姓足孰與不足今所營構務從節儉無令
雕墻峻宇復起于當今欲使卑官菲食將貽於後世有司明爲條
格稱朕意焉十二月乙丑以右武衛將軍來護兒爲右驍衛大將

軍戊辰以柱國李景爲右武衛大將軍以右衛率周羅暉爲右武
候大將軍

大業元年春正月壬辰朔大赦改元立妃蕭氏爲皇后改豫州爲
溱州洛州爲豫州廢諸州總管府景申立晉王昭爲皇太子丁酉
以上柱國宇文述爲左衛大將軍上柱國郭衍爲左武衛大將軍
延壽公于仲文爲右衛大將軍己亥以豫章王暕爲豫州牧戊申
癸八使巡省風俗下詔曰昔者哲王之治天下也其在愛民乎旣
富而教家給人足故能風淳俗厚遠至邇安治定民功成率由斯道
朕嗣膺寶曆撫育黎獻夙夜戰兢若臨川谷雖則聿遵先緒弗敢
失墜永言政術多有缺然況以四海之遠兆民之衆未獲親臨問
其疾苦每慮幽仄莫舉冤屈不申一物失所乃傷和氣萬方有罪
責在朕躬所以監寐增歎而夕惕載懷者也今旣布政惟始宜存

寬大可分遣使人巡省方俗宣揚風化薦拔淹滯申達幽枉孝悌
力田給以優復鰥寡孤獨不能自存者量加振濟義夫節婦旌表
門閭高年之老加其版授並依別條賜以粟帛篤疾之徒給侍丁
者雖有侍養之名曾無贖贍之實明加檢校使得存養若有名行
顯著操履修潔及學業才能一藝可取咸宜訪採將身入朝所在
州縣以禮發遣其有蠹政害人不便於時者使還之日具錄奏聞
已酉以吳州總管宇文弼爲刑部尚書二月巳卯以尚書左僕射
楊素爲尚書令三月丁未詔尚書令楊素納言楊達將作大匠字
文愷營建東京徙豫州郭下居人以實之戊申詔曰聽採輿頌謀
及庶民故能審政刑之得失是知昧旦思治欲使幽枉必達彝倫
有章而牧宰任稱朝委苟爲徼幸以求考課虛立殿最不存治實
綱紀於是弗理冤屈所以莫申關河重阻無由自達朕故建立東

京躬親存問今將巡歷淮海觀省風俗眷求讜言徒繫詞翰而鄉
校之內闕爾無聞惟然夕惕用忘興寢其民下有知州縣官人政
治苛刻侵害百姓背公徇私不便於民者宜聽詣朝堂封奏庶乎
四聰以達天下無冤又於阜澗營顯仁宮採海內奇禽異獸草木
之類以實園苑徙天下富商大賈數萬家於東京辛亥發河南諸
郡男女百餘萬開通濟渠自西苑引穀洛水達于河自板渚引河
通于淮庚申遣黃門侍郎王弘上儀同千士澄往江南採木造龍
舟鳳艗黃龍赤艦樓船等數萬艘夏四月癸亥大將軍劉方擊林
邑破之五月庚戌民部尚書義豐侯韋沖卒六月甲子熒惑入太
微秋七月丁酉制戰亡之家給復十年景午滕王綸衛王集並奪
爵徙邊閏七月甲子以尚書令楊素爲太子太師安德王雄爲太
子太傅河間王弘爲太子太保景子詔曰君民建國教學爲先移

風易俗必自茲始而言絕義乖多歷年代進德修業其道寔微漢
採坑焚之餘不絕如線晉承板蕩之運掃地將盡自時厥後軍國
多虞雖復黷宇時建示同愛禮函文或陳殆爲虛器遂使紆青拖
紫非以學優製錦操刀類多牆面上陵下替綱維靡立雅缺道消
實由於此朕纂承洪緒思弘大訓將欲尊師重道用闡厥繇講信
修睦敦獎各教方今宇宙平一文軌攸同十步之內必有芳草四
海之中豈無奇秀諸在家及見入學者若有篤志好古耽悅典墳
學行優敏堪膺時務所在採訪具以名聞卽當隨其器能擢以不
次若研精經術未願進仕者可依其藝業深淺門蔭高卑雖未升
朝並量準給祿庶夫恂恂善誘不日成器濟濟盈朝何遠之有其
國子等學亦宜申明舊制教習生徒具爲課試之法以盡砥礪之
道八月壬寅上御龍舟幸江都以左武衛大將軍郭衍爲前軍右
武衛大將軍李景爲後軍文武官五品已上給樓船九品已上給
黃蔑舳艫相接二百餘里冬十月己丑赦江淮已南揚州給復五
年舊總管內給復三年十一月己未以大將軍崔仲方爲禮部尚
書

二年春正月辛酉東京成賜監督者各有差以大理卿梁毗爲刑
部尚書丁卯遣十使併省州縣二月景戌詔尚書令楊素吏部尚
書牛弘大將軍宇文愷內史侍郎虞世基禮部侍郎許善心制定
輿服始備輦路及五時副車上常服皮弁十有二珙文官弁服佩
玉五品已上給犢車通幟三公親王加油絡武官平巾幘袴褶三
品已上給袍襍下至胥吏服色皆有差非庶人不得戎服戊戌置
都尉官三月庚午車駕發江都先是太府少卿何稠太府丞雲定
興盛修儀仗於是課州縣送羽毛百姓求捕之網羅被水陸禽獸

有堪斃眊之用者殆無遺類至是而成夏四月庚戌上自伊闕陳
法駕備千乘萬騎入於東京辛亥上御端門大赦免天下今年租
稅癸丑以冀州刺史楊文思爲民部尚書五月甲寅金紫光祿大
夫兵部尚書李通坐事免乙卯詔曰旌表先哲式存饗祀所以優
禮賢能顯彰遺愛朕永鑒前修尚想名德何嘗不興歎九原屬懷
千載其自古已來賢人君子有能樹聲立德佐世匡時博利殊功
有益於人者並宜營立祠宇以時致祭墳壟之處不得侵踐有司
量爲條式稱朕意焉六月壬子以尚書令太子太師楊素爲司徒
進封豫章王暕爲齊王秋七月癸丑以衛尉卿衛玄爲工部尚書
庚申制百官不得計考增級必有德行功能灼然顯著者擢之壬
戌擢藩邸舊臣鮮于羅等二十七人官爵有差甲戌皇太子昭薨
乙亥上在國司徒楚國公楊素薨八月辛卯封皇孫倓爲燕王侗

爲越王

口傳宋本

爲代王九月乙丑立秦孝王俊子浩爲秦王冬十月戊

子以靈州刺史段文振爲兵部尚書十一月庚寅詔曰前代帝王
因時創業君民建國禮尊南面而歷運推移年世永久丘壟殘毀
樵牧相趨塋兆堙蕪封樹莫辨興言淪滅有愴于懷自古已來帝
王陵墓可給隨近十戶蠲其雜役以供守視

三年春正月癸亥敕并州逆黨已流配而逃亡者所獲之處卽宜
斬決景子長星竟天出於東壁二旬而止是月武陽郡上言河水
清二月己丑彗星見於奎掃文昌歷大陵五車北河入太微掃帝
坐前後百餘日而止三月辛亥車駕還京師壬子以大將軍姚辨
爲左屯衛將軍癸丑遣羽騎尉朱寬使於流求國乙卯河間王弘
薨夏四月庚辰詔曰古者帝王觀風問俗皆所以憂勤兆庶安集
遐荒自蕃夷內附未遑親撫山東經亂須加存卹今欲安輯河北

巡省趙魏所司依式甲申頒律令大赦天下關內給復三年壬辰
改州爲郡改度量權衡並依古式改上柱國已下官爲大夫甲午
詔曰天下之重非獨治所安帝王之功豈一士之略自古明君哲
后立政經邦何嘗不選賢與能收採幽滯周稱多士漢號得人常
想前風載懷欽佇朕負辰夙興冕旒待旦引領巖谷寘以周行冀
與羣才共康庶績而彙茅寂寞投竿罕至豈美璞韜采未值良工
將介石在懷確乎難拔永鑒前哲憮然興歎凡厥在位譬諸股肱
若濟巨川義同舟楫豈得保茲寵祿晦爾所知優游卒歲甚非謂
也祁大夫之舉善良史以爲至公臧文仲之蔽賢尼父譏其竊位
求諸往古非無褒貶宜思進善用寡薄夫孝悌有聞人倫之本
德行敦厚立身之基或節義可稱或操履清絜所以激貪勵俗有
蓋風化強毅正直執憲不撓學業優敏文才美秀並爲廊廟之用

實乃瑚璉之資才堪將略則拔之以禦侮膂力驍壯則任之以爪
牙爰及一藝可取亦宜採錄衆善畢舉與時無棄以此求治庶幾
非遠文武有職事者五品已上宜依令十科舉人有一於此不必
求備朕當待以不次隨才升擢其見任九品已上官者不在舉送
之限景申車于北巡狩丁酉以刑部尚書宇文弼爲禮部尚書戊
戌敕百司不得踐暴禾稼其有須開爲路者有司計地所收卽以
近倉酬賜務從優厚己亥次赤岸澤以太牢祭故太師李穆墓五
月丁巳突厥啟民可汗遣子拓特勒來朝戊午發河北十餘郡丁
男鑿太行山達于并州以通馳道景寅啟民可汗遣其兄子毗黎
伽特勒來朝辛未啟民可汗遣使請自入塞奉迎輿駕上不許癸
酉有星孛於文昌上將星皆動搖六月辛巳獵於連谷丁亥詔曰
聿追孝饗德莫至焉崇建寢廟禮之大者然則質文異代損益殊

時學滅坑焚經典散逸憲章湮墜廟堂制度師說不同所以世數
多少莫能是正連室異宮亦無準定朕獲奉祖宗欽承景業永惟
嚴配思隆大典於是詢謀在位博訪儒術咸以爲高祖文皇帝受
天明命奄有區夏拯羣飛於四海革凋敝於百王恤獄緩刑生靈
皆遂其性輕徭薄賦比屋各安其業恢夷宇宙混壹車書東漸西
被無思不服南征北怨俱荷來蘇駕毳乘風歷代所弗至辨髮左
衽聲教所罕及莫不厥角關塞頓顙闕庭譯靡絕時書無虛月韜
戈偃武天下晏如嘉瑞休徵表裏禔福猗歟偉歟無得而名者也
朕又聞之德厚者流光治辨者禮縟是以周之文武漢之高光其
典章特立謚號斯重豈非緣情稱述卽崇顯之義乎高祖文皇帝
宜別建廟宇以彰巍巍之德仍遵月祭用表蒸蒸之懷有司以時
創造務合典制又各位旣殊禮亦異等天子七廟事著前經諸侯

二昭義有差降故其以多爲貴王者之禮今可依用貽厥後昆戊
子次榆林郡丁酉啟民可汗來朝己亥吐谷渾高昌並遣使貢方
物甲辰上御北樓觀漁於河以宴百寮秋七月辛亥啟民可汗上
表請變服襲冠帶詔啟民贊拜不各位在諸侯王上甲寅上於郡
城東御大帳其下備儀衛建旌旗宴啟民及其部落三千五百人
奏百戲之樂賜啟民及其部落各有差景子殺光祿大夫賀若弼
禮部尚書宇文弼太常卿高頴尚書左僕射蘇威坐事免癸丁男
百餘萬築長城西距榆林東至紫河一旬而罷死者十五六八月
壬午車駕發榆林乙酉啟民飾廬清道以候乘輿帝幸其帳啟民
奉觴上壽宴賜極厚上謂高麗使者曰歸語爾王當早來朝見不
然者吾與啟民巡彼土矣皇后亦幸義城主帳己丑啟民可汗歸
蕃癸巳入樓煩關壬寅次太原詔營晉陽宮九月己未次濟源幸

御史大夫張衡宅宴享極歡已已至於東都壬申以齊王璵為河南尹開府儀同三司癸酉以民部尚書楊文思為納言

四年春正月乙巳詔發河北諸郡男女百餘萬開朱濟渠引沁水南達于河北通涿郡庚戌百寮大射于允武殿丁卯賜城內居民米各十石壬申以太府卿元壽為內史令鴻臚卿楊玄感為禮部尚書癸酉以工部尚書衛玄為右候衛大將軍大理卿長孫熾為民部尚書二月己卯遣司朝謁者崔毅使突厥處羅致汗血馬三月辛酉以將作大匠宇文愷為工部尚書壬戌百濟倭赤土迦羅舍國並遣使貢方物乙丑車駕幸五原因出塞巡長城景寅遣屯田主事常駿使赤土致羅薊夏四月景午以離石之汾源臨泉雁門之秀容為樓煩郡起汾陽宮癸丑以河內太守張定和為左屯衛大將軍乙卯詔曰突厥意利珍豆啟民可汗率領部落保附關

塞遵奉朝化思改戎俗頻入謁覲屢有陳請以氍毹幕事窮荒陋上棟下宇願同比屋誠心懇切朕之所重宜於萬壽戍置城造屋其帷帳牀褥已上隨事量給務從優厚稱狀意焉五月壬申蜀郡獲三足烏張掖獲玄狐各一秋七月辛巳癸丁男二十餘萬築長城自榆林谷而東乙未左翊衛大將軍宇文述破吐谷渾於曼頭赤水八月辛酉親祠恒岳河北道郡守畢集大赦天下車駕所經郡縣免一年租調九月辛未徵天下鷹師悉集東京至者萬餘人戊寅彗星出於五車掃文昌至房而滅辛巳詔免長城役者一年租賦冬十月景午詔曰先師尼父聖德在躬誕發天縱之姿憲章文武之道命世膺期蘊茲素王而頹山之歎忽踰於千祀盛德之美不存於百代永惟懿範宜有優崇可立孔子後為紹聖侯有司求其苗裔錄以申上辛亥詔曰昔周王下車首封唐虞之胤漢

帝承曆亦命及周之後皆所以褒立先代憲章在昔朕嗣膺景業
旁求雅訓有一弘益欽若令典以為周兼夏殷文質大備漢有天
下車書混一魏晉沿襲風流未遠並宜立後以存繼絕之義有司
可求其胄緒列聞已卯頒新式於天下

五年春正月景子改東京為東都癸未詔天下均田戊子自上自東
都還京師己丑制民間鐵叉搭鈎積办之類皆禁絕之太守每歲
密上屬官景迹二月戊戌次于闕鄉詔祭古帝王陵及開皇功臣
墓庚子制魏周官不得為蔭辛丑赤土國遣使貢方物戊申車駕
至京師景辰宴耆舊四百人於武德殿頒賜各有差己未上御崇
德殿之西院愀然不怡顧謂左右曰此先帝之所居實用增感情
所未安宜於此院之西別營一殿壬戌制父母聽隨子之官三月
己巳車駕西巡河右庚午有司言武功男子史永遵與從父昆弟

同居上嘉之賜物一百段米二百石表其門閭乙亥幸扶風舊宅
夏四月己亥大獵於隴西壬寅高昌吐谷渾伊吾並遣使來朝乙
巳次狄道党項羌來貢方物癸亥出臨津關渡黃河至西平陳兵
講武五月乙亥上大獵於拔延山長圍周亘二千里庚辰入長寧
谷度星嶺甲申宴羣臣於金山之上景戌梁浩豐御馬度而橋壞
斬朝散大夫黃亘及督役者九人吐谷渾王率眾保覆袁川帝分
命內史元壽南屯金山兵部尚書段文振北屯雪山太僕卿楊義
臣東屯琵琶峽將軍張壽西屯泥嶺四面圍之渾王伏允以數十
騎遁出遣其名王詐稱伏允保車我真山壬辰詔右屯衛大將軍
張定和徃捕之定和挺身挑戰為賊所殺亞將柈武建擊破之斬
首數百級甲午其仙頭正一作王被圍窮蹙率男女十餘萬口來降
六月丁酉遣左光祿大夫梁默右翊衛將軍李瓊等追渾王皆遇

賊死之癸卯經大斗拔谷山路隘險魚貫而出風霰晦冥與從官相失士卒凍死者大半景午次張掖辛亥詔諸郡學業該通才藝優洽膂力驍壯超絕等倫在官勤舊一作堪堪理政事立性正直不避強禦四科舉人壬子高昌王麴伯雅來朝伊吾吐屯設等獻西域數千里之地上大悅癸丑置西海河源郡昔且未等四郡景辰上御觀風行殿盛陳文物奏九部樂設魚龍曼延宴高昌王吐屯設於殿上以寵異之其蠻夷陪列者三十餘國戊午大赦天下開皇已來流配悉放還鄉晉陽逆黨不在此例隴右諸郡給復一年行經之所給復二年秋七月丁卯置馬牧於青海渚中以求龍種無效而止九月癸未車駕入長安冬十月癸亥詔曰優德尚齒載之典訓尊事乞言義彰膠序鬻熊爲師取非筋力方叔元老克壯其猷朕永言稽古用求至治是以龐眉黃髮更令收叙務簡秩優無虧

藥膳庶等臥治佇其弘益今歲耆老赴集者可於近郡處置年七十以上疾患沉滯不堪居職卽給賜帛送還本郡其官至七品已上者量給廩以終厥身十一月景子車駕幸東都

六年春正月癸亥朔且有盜數十人皆素冠練衣焚香持華自稱彌勒佛入自建國門監門者皆稽首旣而奪衛士仗將爲亂齊王暕遇而斬之於是都下大索與相連坐者千餘家丁丑角抵大戲於端門街天下奇伎異藝畢集終月而罷帝數微服往觀之己丑倭國遣使貢方物二月乙巳武賁郎將陳稜朝請大夫張鎮州擊流求破之獻俘萬七千口頒賜百官乙卯詔曰夫帝圖草創王業艱難咸仗股肱叶同心德用能拯厥頽運克膺大寶然後疇庸茂賞開國承家誓以山河傳之不朽近代喪亂四海未一茅土妄假名實相乖歷茲永久莫能懲革皇運之初百度伊始猶循舊貫未

暇改作今天下交泰文軌攸同宜率遵先典永垂大訓自今已後
唯有功勳乃得賜封仍令子孫承襲景辰改封安德王雄爲觀王
河間王子慶爲郇王庚申徵魏齊周陳樂人悉配太常三月癸亥
幸江都宮甲子以鴻臚卿史祥爲左驍衛大將軍夏四月丁未冥
江淮已南父老頒賜各有差六月辛卯室韋赤土並遣使貢方物
壬辰雁門賊帥尉文通聚衆三千保於莫壁各遣鷹揚楊伯泉擊
破之甲寅制江都太守秩同京尹冬十月壬申刑部尚書梁毗卒
壬子民部尚書銀青光祿大夫長孫熾卒十二月己未左光祿大
夫吏部尚書牛弘卒辛酉朱崖人王萬昌舉兵作亂遣隴西太守
韓洪討平之

七年春正月壬寅左武衛大將軍光祿大夫真定侯郭衍卒二月
己未上升鈞臺臨揚子津大宴百寮頒賜各有差庚申百濟遣使
朝貢乙亥上自江都御龍舟入通濟渠遂幸于涿郡壬午詔曰武
有七德先之以安民政有六本興之以教義高麗高元虧失藩禮
將欲問罪遼佐恢宣勝略雖懷伐國仍事省方今徃涿郡巡撫民
俗其河北諸郡及山西山北年九十已上者版授太守八十者授
縣令三月丁亥右光祿大夫左屯衛大將軍姚辯卒夏四月庚午
至涿郡之臨朔宮五月戊子以武威太守樊子蓋爲民部尚書秋
大水山東河南漂沒三十餘郡民相賣爲奴婢冬十月乙卯底柱
山崩偃河逆流數十里戊午以東平太守吐萬緒爲左屯衛大將
軍十二月己未西面突厥處羅多利可汗來朝上大悅接以殊禮
於時遼東戰士及餽運者填咽於道晝夜不絕苦役者始爲羣盜
甲子敕都尉鷹揚與郡縣相知追捕隨獲斬決之

隋書卷四

帝紀第四

煬帝下

特進臣魏

徵上

魏書卷四

八年春正月辛巳大軍集于涿郡以兵部尚書段文振為左候衛
 大將軍壬午下詔曰天地大德降繁霜於秋令聖哲至仁著甲兵
 於刑典故知造化之有肅殺義在無私帝王之用干戈蓋非獲已
 版泉丹浦莫匪龔行取亂覆昏咸由順動況乎甘野誓師夏開承
 大禹之業商郊問罪周發成文王之志永監前載屬當朕躬粵我
 有隋誕膺靈命兼三才而建極一六合而為家提封所漸細柳盤
 桃之外聲教爰暨紫舌黃枝之域遠至邇安罔不和會功成治定
 於是乎在而高麗小醜迷昏不恭崇大勃碣之間薦食遼穢之境
 雖復漢魏誅戮巢窟暫傾亂離多阻種落還集萃州數於往代播

實繁以迄今踰彼華壤剪爲夷類歷年永久惡稔旣盈天道禍淫
亡徵已兆亂常敗德非可勝圖掩愆懷姦惟日不足移告之嚴未
嘗面受朝覲之禮莫肯躬親誘納亡叛不知紀極充斥邊陲亟勞
烽候關柝以之不靜生人爲之廢業在昔薄伐已漏天網旣緩前
禽之戮未卽後服之誅曾不懷恩翻爲長惡乃兼契丹之黨虔劉
海戍習韎鞞之服侵軼遼西又青丘之表成修職貢碧海之濱同
稟正朔遂復敝壤琛賫遏絕往來虐及弗辜誠而遇禍輶軒奉使
委暨海東旌節所次途經藩境而擁塞道路拒絕王人無事君之
心豈爲臣之禮此而可忍孰不可容且法令苛酷賦歛煩重強臣
豪族咸執國鈞朋黨比周以之成俗賄貨如市冤枉莫伸重以仍
歲災凶比屋饑饉兵戈不息徭役無期力竭轉輸身填溝壑百姓
愁苦爰誰適從境內哀惶不勝其弊迴首面內各懷性命之圖黃

髮稚齒咸與酷毒之歎省俗觀風爰屆幽朔弔人問罪無俟再駕
於是親總六師用申九伐拯厥阡危協從天意殄茲逋穢尅嗣先
謨今宜授律啟行分麾屆路掩勃澥而雷震歷夫餘以電掃比戈
按甲誓旅而後行先令五申必勝而後戰左第一軍可鏤方道第
二軍可長岑道第三軍可海冥道第四軍可益馬道第五軍可建
安道第六軍可南蘇道第七軍可遼東道第八軍可玄菟道第九
軍可扶餘道第十軍可朝鮮道第十一軍可沃沮道第十二軍可
樂浪道右第一軍可黏蟬道第二軍可合資道第三軍可渾彌道
第四軍可臨屯道第五軍可候城道第六軍可提奚道第七軍可
踏頓道第八軍可肅慎道第九軍可碣石道第十軍可東曉道第
十一軍可帶方道第十二軍可襄平道凡此衆軍先奉廟略駱驛
引途總集平壤莫非如豺如豨之勇百戰百勝之雄顧盼則山岳

傾頽叱吒則風雲騰鬱心德攸同爪牙斯在朕躬馭元戎爲其節
度涉遼而東循海之右解倒懸於遐裔問疾苦於遺黎其外輕齎
遊關隨機赴響卷甲銜枚出其不意又滄海道軍舟艦千里高駟
電逝巨艦雲飛橫斷沮江遙造平壤島嶼之望斯絕坎井之路已
窮其餘被髮左衽之人控弦待發微盧彭濮之旅不謀同辭杖順
臨逆人百其勇以此衆戰勢等摧枯然則王者之師義存止殺聖
人之教必也勝殘天罰有罪本在元惡人之多僻脇從罔治若高
元泥首轅門自歸司寇卽宜解縛焚櫬弘之以恩其餘臣人歸朝
奉順咸加慰撫各安生業隨才任用無隔夷夏營壘所次務在整
肅芻蕘有禁秋毫勿犯布以恩宥喻以禍福若其同惡相濟抗拒
官軍國有常刑俾無遺類明加曉示稱朕意焉總一百一十三萬
三千八百號二百萬其餽運者倍之癸未第一軍發終四十日引
師乃盡旌旗亘千里近古出師之盛未之有也乙未以右候衛大
將軍衛玄爲刑部尚書甲辰內史令元壽卒二月甲寅詔曰朕觀
風燕裔問罪遼濱文武叶力爪牙思奮莫不執銳勤王捨家從役
罕蓄倉廩之資兼損播殖之務朕所以夕惕愀然慮其匱乏雖復
素飽之衆情在忘私悅使之人宜從其厚諸行從一品以下飲飛
募人以上家口郡縣宜數存問若有糧食乏少皆宜賑給或雖有
田疇貧弱不能自耕種可於多丁富室勸課相助使夫居者有斂
積之豐行役無顧後之慮壬戌司空京兆尹光祿大夫觀王雄薨
三月辛卯兵部尚書左候衛大將軍段文振卒癸巳上御師甲午
臨戎於遼水橋戊戌大軍爲賊所拒不果濟右屯衛大將軍左光
祿大夫麥鐵杖武賁郎將錢士雄孟金义等皆死之甲午車駕度
遼大戰于東岸擊賊破之進圍遼東乙未大頓見二大鳥高丈餘

皜身朱足遊泳自若上異之命工圖寫并立銘頌五月壬午納言
楊達卒于時諸將各奉_龜莫敢起_龜機既而高麗各城守攻之不下
六月己未幸遼東責怒諸將止城西數里御六合城七月壬寅字
文述等敗績于薩水右屯衛將軍辛世雄死之九軍並陷將帥奔
還亡者二千餘騎癸卯班師九月庚寅上至東都已丑詔曰軍國
異容文武殊用匡危拯難則霸德攸興化人成俗則王道斯貴時
方撥亂屠販可以登朝世屬隆平經術然後升任豐都爰肇儒服
無預於周行建武之朝功臣不參于吏職自三方未一四海交爭
不遑文教唯尚武功設官分職罕以才授班朝治人乃由勲叙莫
非拔足行陣出自勇夫_學之道既所不習政事之方故亦無取
是非暗于在已威福專於下吏貪昌貨賄不知紀極蠹政害民實
由於此自今已後諸授勲官者並不得回授文武職事庶遵彼更
張取類於調瑟求諸名毀不傷于美錦若吏部輒擬用者御史卽
宜糾彈冬十月甲寅工部尚書宇文愷卒十一月己卯以宗女華
容公主嫁于高昌_{雅木多}辛巳光祿大夫韓壽卒甲申敗將宇文述
于仲文等並除名爲民斬尚書右丞劉士龍以謝天下是歲大旱
疫人多死山東尤甚密詔江淮南諸郡閱視民間童女姿質端麗
者每歲貢之

九年春正月丁丑徵天下兵募民爲驍果集于涿郡壬午賊帥杜
彥冰王潤等陷平原郡大掠而去辛卯置折衝果毅武勇雄武等
郎將官以領驍果乙未平原李德逸聚衆數萬稱阿舅賊劫掠山
東靈武白榆妄稱奴賊劫掠牧馬北連突厥隴右多被其患遣將
軍范貴討之連年不能剋戊戌大赦己亥遣代王_侑本_諱刑部尚書衛
玄鎮京師辛丑以右驍騎將軍李渾爲右驍衛大將軍二月己未

濟北人韓進洛聚眾數萬爲羣盜壬午復宇文述等官爵又徵兵討高麗三月景子濟陰人孟海公起兵爲盜眾至數萬丁丑癸丁男十萬城大興戊寅幸遼東以越王侗民部尚書樊子蓋留守東都庚子北海人郭方頂聚徒爲盜自號盧公眾至三萬攻陷郡城大掠而去夏四月庚午車駕度遼壬申遣宇文述楊義臣趣平壤五月丁丑熒惑入南斗己卯濟北人甄寶車聚眾萬餘寇掠城邑六月乙巳禮部尚書楊玄感反於黎陽景辰玄感逼東都河南贊務裴弘策拒之反爲賊所敗戊辰兵部侍郎斛斯政奔于高麗庚午上班師高麗犯後軍敕右武衛大將軍李景爲後拒遣左翊衛大將軍宇文述左候衛將軍屈突通等馳傳發兵以討玄感秋七月己卯令所在發人城縣府驛癸未餘杭人劉元進舉兵反眾至數萬八月壬寅左翊衛大將軍宇文述等破楊玄感於閩鄉斬之餘黨悉平癸卯吳人朱燮晉陵人管崇擁眾十萬餘自稱將軍寇江左甲辰制驍果之家蠲免賦役丁未詔郡縣城去道過五里已上者徙就之戊申制盜賊籍沒其家乙卯賊帥陳瑱等眾三萬攻陷信安郡辛酉司農卿光祿大夫葛國公趙元淑以罪伏誅九月己卯濟陰人吳海流東海人彭孝才並舉兵爲盜眾數萬庚辰賊帥梁慧尚率眾四萬陷蒼梧郡甲午車駕次上谷以供費不給上大怒免太守虞荷等官丁酉東陽人李三兒向但子舉兵作亂眾至萬餘閏月己巳幸博陵庚午上謂侍臣曰朕昔從先朝周旋於此年甫八歲日月不居倏經三紀追惟平昔不可復希言未卒流涕嗚咽侍衛者皆泣下沾襟冬十月丁丑賊帥呂明星率眾數千圍東郡武賁郎將費青奴擊斬之乙酉詔曰博陵昔爲定州地居衝要先皇歷試所基王化斯遠故以道冠幽風義高姚邑朕巡撫

氓庶爰屆茲邦瞻望郊廛緬懷敬止思所以宣播德澤覃被下人
崇紀顯號式光令緒可改博陵爲高陽郡赦境內死罪已下給復一
年於是召高祖時故吏皆量材授職壬辰以納言蘇威爲開府儀
同三司朱熒管崇推劉元進爲天子遣將軍吐萬緒魚俱羅討之
連年不能剋齊人孟讓王薄等衆十餘萬據長白山攻剽諸郡清
河賊張金稱衆數萬渤海賊帥格謙自號燕王孫宣雅自號齊王
衆各十萬山東苦之丁亥以右候衛將軍郭榮爲右候衛大將軍
十一月己酉右候衛將軍馮老慈討張金稱於清河反爲所敗老
慈死之十二月甲申車裂玄感弟朝請大夫積善及黨與十餘人
仍焚而揚之丁亥扶風人向海明舉兵作亂稱皇帝建元白鳥遣
太僕卿楊義臣擊破之

十年春正月甲寅以宗女爲信義公主嫁於突厥曷娑那可汗二
月辛未詔百寮議伐高麗數日無敢言者戊子詔曰竭力王役致
身戎事咸由徇義莫匪勤誠委命草澤棄骸原野興言念之每懷
愍惻往年出車問罪將屆遼瀋廟算勝略具有進止而諛僭凶罔
識成敗高頗復很本無智謀臨三軍猶兒戲視人命如草芥不遵
成規坐貽撓退遂令死亡者衆不及埋藏今宜遣使人分道收葬
設祭於遼西郡立道場一所恩加泉壤庶弭窮魂之寃澤及枯骨
用弘仁者之惠辛卯詔曰黃帝五十二戰成湯二十七征方乃德
施諸侯令行天下盧芳小盜漢祖尚且親戎隗囂餘燼光武猶自
登隴豈不欲除暴止戈勞而後逸者哉朕纂成寶業君臨天下日
月所照風雨所沾孰非我臣獨隔聲教葺爾高麗僻居荒表鷓鴣張
狼噬侮慢不恭抄竊我邊垂侵軼我城鎮是以去歲出軍問罪遼
碣殪長蛇於玄菟戮封豕於襄平扶餘衆軍風馳電逝追奔逐北

徑踰沮水滄海舟楫衝賊腹心焚其城郭汗其宮室高元伏鑽泥
首送款軍門尋請入朝歸罪司寇朕以許其改過乃詔班師而長
惡靡悛宴安鴆毒此而可忍孰不可容便可分命六師百道俱進
朕當親執武節臨御諸軍秣馬九都觀兵遼水順天誅於海外救
窮民於倒懸征伐以正之明德以誅之止除元惡餘無所問若有
識存亡之分悟安危之機翻然北首自求多福必其同惡相濟抗
拒王師若火燎原刑茲無赦有司便宜宣布咸使知聞丁酉扶風
人唐弼舉兵反衆十萬推李弘爲天子自稱唐王三月壬子行幸
涿郡癸亥次臨渝宮親御戎服禡祭黃帝斬叛軍者以豐鼓夏四
月辛未彭城賊張大彪聚衆數萬保懸薄山爲盜遣榆林太守董
純擊破斬之甲午車駕次北平五月庚子詔舉郡宰悌廉絜各十
人壬寅賊帥宋世謨陷琅邪郡庚申延安人劉迦論舉兵反自稱

皇王建元大世六月辛未賊帥鄭文唯林寶護等衆三萬陷建安
郡太守楊景祥死之秋七月癸丑車駕次懷遠鎮乙卯曹國遣使
貢方物甲子高麗遣使請降囚送斛斯政上大悅八月己巳班師
庚午右衛大將軍左光祿大夫鄭榮卒冬十月丁卯上至東都已
丑還京師十一月景申支解斛斯政於金光門外乙巳有事於南
郊己酉賊帥司馬長安破長平郡乙卯離石胡劉苗王舉兵反自
稱天子以其第六兒爲永安王衆至數萬將軍潘長文討之不能
尅是月賊帥王德仁擁衆數萬保林慮山爲盜十二月壬申上如
東都其日大赦天下戊子入東都庚寅賊帥孟讓衆十餘萬據都
梁宮遣江都郡丞王世充擊破之盡虜其衆
十一年春正月甲午朔大宴百寮突厥新羅靺鞨畢大辭訶咄傳
越烏那曷波臘吐火羅俱慮建忽論靺鞨訶多沛汗龜茲疎勒于

闕安國曹國何國穆國畢衣密失范延伽折契丹等國並遣使朝
貢戊戌武賁郎將高建毗破賊帥顏宣政於齊郡虜男女數千口
乙卯大會蠻夷設魚龍曼延之樂頒賜各有差二月戊辰賊帥揚
仲緒率衆萬餘攻北平滑公李景破斬之庚午詔曰設險守國著
自前經重門禦暴事彰往策所以宅土寧邦禁邪固本而近代戰
爭居人散逸田疇無伍郭郭不修遂使遊惰實繁寇讎未息今天
下平一海內晏如宜令人悉城居田隨近給使強弱相容力役兼
濟穿窬無所厝其姦宄崔蒲不得聚其逋逃有司具爲事條務令
得所景子土谷人王須拔反自稱漫天王國號燕賊帥魏刁兒自
稱歷山飛衆各十餘萬北連突厥南寇趙五月丁酉殺右驍衛大
將軍光祿大夫郕公李渾將作監光祿大夫李敏並族滅其家癸
卯賊帥司馬長安破西河郡己酉幸太原避暑汾陽宮秋七月己
亥淮南人張起緒舉兵爲盜衆至三萬辛丑光祿大夫右禦衛大
將軍張壽卒八月乙丑巡北塞戊辰突厥始畢可汗率騎數十萬
謀襲乘輿義成公主遣使告變壬申車駕馳幸雁門癸酉突厥圍
城官軍頻戰不利上大懼欲率精騎潰圍而出民部尚書樊子蓋
固諫乃止齊王暕以後軍保於崞縣甲申詔天下諸郡募兵於是
守令各來赴難九月甲辰突厥解圍而去丁未曲赦太原雁門郡
死罪已下冬十月壬戌上至於東都丁卯彭城人魏騏驎聚衆萬
餘爲盜寇魯郡壬申賊帥盧明月聚衆十餘萬寇陳汝間東海賊
帥李子通擁衆度淮自號楚王建元明政寇江都十一月乙卯賊
帥王須拔破高陽郡十二月戊寅有大流星如斛墜明月營破其
衝車庚辰詔民部尚書樊子蓋發關中兵討絳郡賊敬盤陀柴保
昌等經年不能尅譙郡人朱粲擁衆數十萬寇荆襄僭稱楚帝建

元昌達漢南諸郡多為所陷焉

十二年春正月甲午雁門人翟松柏起兵於靈丘眾至數萬轉攻
傍縣二月己未真臘國遣使貢方物申子夜有二大鳥似鵬飛入
大業殿止于御幄至明而去癸亥東海賊盧公進率眾萬餘保于
蒼山夏四月丁巳顯陽門火癸亥魏刀兒所部將甄翟兒復號歷
山飛眾十萬轉寇太原將軍潘長文討之反為所敗長文死之五
月景戌朔日有蝕之既癸巳大流星隕于吳郡為石壬午上於景
華宮徵求螢火得數斛夜出遊山放之光徧巖谷秋七月壬戌民
部尚書光祿大夫濟北公樊子蓋卒甲子幸江都宮以越王侗光
祿大夫段達太府卿元文都檢校民部尚書韋津左武衛將軍皇
甫無逸右司郎盧楚等總留後事奉信郎崔民象以盜賊充斥於
建國門上表諫不宜巡幸上大怒先解其順乃斬之戊辰馮翊人

孫華自號總管舉兵為盜高涼通守洗瑤徹舉兵作亂嶺南溪洞

多應之己巳熒惑守羽林月餘乃退車駕次汜水奉信郎王愛仁

以盜賊日盛諫上請還西京上怒斬之而行八月乙巳賊帥趙萬

海眾數十萬自恒山寇高陽壬子有大流星如斗出王良閣道聲

如墮牆癸五大流星如甕出羽林九月丁酉東海人杜威蘇本多沃楊州沈覓

敵等作亂眾至數萬右禦衛將軍陳稜擊破之戊午有二枉矢出

北斗魁委曲蛇形注于南斗壬戌安定人荔非世雄殺臨涇令舉

兵作亂自號將軍冬十月己丑開府儀同三司左翊衛大將軍光

祿大夫許公宇文述薨十二日癸未鄱陽賊操天成舉兵反自號元興

王建元始興攻陷豫章郡乙酉以右翊衛大將軍來護兒為開府儀

同三司行左翊衛大將軍壬辰鄱陽人林士弘自稱皇帝國號楚建

元太平攻陷九江廬陵郡唐公破甄翟兒於西河虜男女數千口

隋書卷一百一十五

十三年春正月壬子齊郡賊杜伏威率眾度淮攻陷歷陽郡景辰
勃海賊竇建德設壇於河間之樂壽自稱長樂王建元丁丑辛巳
賊帥徐圓朗率眾數千破東平郡弘化人到介成聚眾萬餘人為
盜傍郡苦之二月壬午朔方人梁師都殺郡丞唐世宗據郡反自
稱大丞相遣銀青光祿大夫張世隆擊之反為所敗戊子賊帥王
子英破上谷郡己丑馬邑校尉劉武周殺太守王仁恭舉兵作亂
北連突厥自稱定楊可汗庚寅賊帥李密翟讓等陷興洛倉越王
侗遣武賁郎將劉長恭光祿少卿房胤擊之反為所敗死者十五
六庚子李密自號魏公稱元年開倉以振羣盜眾至數十萬河南
諸郡相繼皆陷焉壬寅劉武周破武賁郎將王智辯于桑乾鎮智
辯死之三月戊午廬江人張子路舉兵反遣右禦衛將軍陳稜討
平之丁丑賊帥李通德眾十萬寇廬江左屯衛將軍張鎮州擊破

之夏四月癸未金城校尉薛舉率眾反自稱西秦霸王建元秦興
攻陷隴右諸郡己丑賊帥孟讓夜入東都外郭燒豐都市而去癸
巳李密陷迴洛東倉丁酉賊帥房憲伯陷汝陰郡是月光祿大夫
裴仁基淮陽太守趙佗等並以眾叛歸李密五月辛卯夜有流星
如甕墜於江都甲子唐公起義師於太原景寅突厥數千寇太原
唐公擊破之秋七月壬子熒惑守積屍景辰武威人李軌舉兵反
攻陷河西諸郡自稱涼王建元安樂八月辛巳唐公破武牙郎將
宋老生於霍邑斬之九月己丑帝括江都人女寡婦以配從兵是
月武陽郡丞元寶藏以郡叛歸李密與賊帥李文相攻陷黎陽倉
彗星見于營室冬十月丁亥太原楊世洛聚眾萬餘人寇掠城邑
景申羅令蕭銑以縣反鄱陽人董景珍以郡反迎銑於羅縣號為
梁王攻陷傍郡戊戌武賁郎將高毗敗濟北郡賊甄寶車於嶺山

十一月景辰唐公入京師辛酉遙尊帝爲太上皇立代王侑爲帝
改元義寧上起宮丹陽將遜于江左有烏鵲來巢幄帳驅不能止
熒惑犯太微有石自江浮入于揚子日光四散如流血上甚惡之
二年三月右屯衛將軍宇文化及武賁郎將司馬德戡元禮監門
直閤裴虔通將作少監宇文智及武勇郎將趙行樞鷹揚郎將孟
景內史舍人元敏符璽郎李覆牛方裕千牛左右李孝本弟孝質
直長許弘仁薛世良城門郎唐奉義警正張愷等以驍果作亂入
犯宮闈上崩于溫室時年五十肅后令宮人撤牀簀爲棺以埋之
化及發後右禦衛將軍陳稜奉梓官于成象殿塋吳公臺下發斂
之始容貌若生衆咸異之大唐平江南之後改塋雷塘初上自以
蕃王次不當林每矯情飾行以釣虛名曠有尊宗之計時高祖雅
信文獻皇后實性忌妾媵皇太子勇內多嬖幸以此失愛帝後庭

有子皆不育之示無私寵取媚於后大臣用事者傾心與交中使
至第無貴賤皆曲承顏色申以厚禮婢僕往來者無不稱其仁孝
又常私入宮掖密謀於獻后楊素等因機構扇遂成廢首高祖大
漸暨諒闇之中蒸淫無度山陵始就卽事巡遊以天下承平日久
士馬全盛慨然慕秦皇漢武之事乃盛治宮室窮極侈靡召募行
人分使絕域諸蕃至者厚加禮賜有不恭命以兵擊之盛興屯田
於玉門柳城之外課天下富室並市武馬匹直十餘萬富強坐是
凍餒者十家而九帝性多詭譎所幸之處不欲人知每之一所輒
數道置頓四海珍羞殊味水陸必備馬求市者無遠不至郡縣官
人競爲獻食豐厚者進擢疎儉者獲罪姦吏侵漁內外虛竭頭會
箕斂人不聊生于時軍國多務日不暇給帝方驕怠惡聞政事寬
屈不治奏請罕決又猜忌臣下無所專任朝臣有不合意者必構

其罪而族滅之故高頰賀若弼先皇心膂參謀帷幄張衡李金才
潘邸惟舊績著經綸或惡其直道或忿其正議求其無形之罪加
以刎頸之誅其餘事君盡禮蹇蹇匪躬無辜無罪橫受夷戮者不
可勝紀政刑弛紊賄貨公行莫敢正言道路以目六軍不息百役
繁興行者不歸居者失業人饑相食邑落爲墟上不之恤也東西
遊幸靡有定居每以供費不給逆收數年之賦所至唯與後宮留
連耽酒惟日不足招迎嫖娼朝夕共肆醜言又引少年令與宮人
穢亂不軌不遜以爲娛樂區宇之內盜賊蜂起劫掠從官屠陷城
邑近臣互相掩蔽隱賊數不以實對或有言賊多者輒大被詰責
各求苟免上下相蒙每出師徒敗亡相繼戰士盡力必不加賞百
姓無辜咸受屠戮黎庶憤怨天下土崩至於就擒而猶未之寤也
史臣曰煬帝爰在弱齡早有令聞南平吳會北却匈奴昆弟之中

獨著聲績於是矯情飾貌肆厥姦回故得獻后鍾心文皇革慮天
方肇亂遂登儲兩踐峻極之崇基承不顯之休命地廣三代威振
八紘單于頓顙越裳重譯赤仄之泉流溢于都內紅腐之衆委積
於塞下負其富強之資思逞無厭之欲狹殷周之制度尚秦漢之
規摹恃才矜已傲很明德內懷險躁外示疑簡盛冠服以飾其姦
除諫官以掩其過淫荒無度法令滋章教絕四維刑參五虐鋤誅
骨肉屠勦忠良受賞者莫見其功爲戮者不知其罪驕怒之兵屢
動土木之功不息頻出朔方三駕遼左旌旗萬里徵稅百端猾吏
侵漁人不堪命乃急令暴條以擾之嚴刑峻法以臨之甲兵威武
以董之自是海內騷然無聊生矣俄而玄感肇黎陽之亂匈奴有
雁門之圍天子方棄中土遠之楊越姦宄乘豐強弱相陵關梁閉
而不通皇輿往而不返加之以師旅因之以饑饉流離道路轉死

溝壑十八九焉於是相聚萑蒲峭毛而起大則跨州連郡稱帝稱王小則千百爲羣攻城剽邑流血成川澤死人如亂麻炊者不及析骸食者不遑易子茫茫九土並爲麋鹿之場悽悽黔黎俱充蛇豕之餌四方萬里簡書相續猶謂鼠竊狗盜不足爲虞上下相蒙莫肯念亂振蟬蛸之羽窮長夜之樂土崩魚爛貫盈惡稔普天之下莫匪仇讎左右之人皆爲敵國終然不悟同彼望夷遂以萬乘之尊死於一夫之手億兆靡感恩之士九牧無勤王之師子弟同就誅夷體■棄而莫掩社稷顛隕本枝殄絕自肇有書契以迄于茲宇宙崩離生靈塗炭喪身滅國未有若斯之甚也書曰天作孽猶可違自作孽不可追傳曰吉凶由人祇不妄作又曰兵猶火也不戢將自焚觀隋室之存亡斯言信而有徵矣

隋書卷四

帝紀第四

終

隋書卷五

帝紀第五

恭帝

特進臣魏徵上

恭皇帝諱侑元德太子之子也母曰韋妃性聰敏有氣度大業三年立爲陳王後數載徙爲代王邑萬戶及煬帝親征遼東令於京師總留事十一年從幸晉陽拜太原太守尋鎮京師義兵入長安尊煬帝爲太上皇帝纂業

義寧元年十一月壬戌上卽皇帝位於大興殿詔曰王道喪亂天步不康古往今來代有其事屬之於朕逢此百罹彼蒼者天胡寧斯忍襁褓之歲夙遭閔凶孺子之辰太上播越興言感動實疚于懷太尉唐公膺期作宰時稱舟楫大拯橫流糾合義兵翼戴皇室與國休戚再匡區夏爰奉明詔弼予幼沖顯命光臨天威咫尺對

西川中書

氏唐國南

揚尊號悼心失圖一人在遠三讓不遂僂俛南面厝身無所苟利社稷莫敢或違俯從羣議奉遵聖旨可大赦天下改大業十三年爲義寧元年十一月十六日味爽以前大辟罪已下皆赦除之常赦所不免者不在赦限甲子以光祿大夫大將軍太尉唐公爲假黃鉞使持節大都督內外諸軍事尚書令大丞相進封唐王景寅詔曰朕惟孺子未出深宮太上遠巡追蹤穆滿時逢多難委當尊極辭不獲免恭已臨朝若涉大川罔知所濟撫躬永歎憂心孔棘民之情僞曾未之聞王業艱難載云其易賴股肱戮力上宰賢良匡佐冲人輔其不逮軍國機務事無大小文武設官位無貴賤憲章賞罰咸歸相府庶績其凝責成斯屬逃聽前史茲爲典故因循仍舊非曰徒言所存至公無爲讓德已巳以唐王子隴西公建成爲唐國世子敦煌公爲京兆尹改封秦公元吉爲齊公食邑各萬

戶太原置鎮北府乙亥張掖康老和舉兵反十二月癸未薛舉自稱天子寇扶風秦公爲元帥擊破之丁亥桂陽人曹武徹舉兵反建元通聖丁酉義師擒驍衛大將軍屈突通於閩鄉虜其衆數萬乙巳賊帥張善安陷廬江郡

二年春正月丁未詔唐王劔履上殿入朝不趨贊拜不名加前後羽葆鼓吹壬戌將軍王世充爲李密所敗河內通守孟善誼武賁郎將王辯楊威劉長恭梁德董智通皆死之庚戌河陽郡尉獨孤武都降於李密三月景辰右屯衛將軍宇文化及殺太上皇於江都宮右禦衛將軍獨孤盛死之齊王暕趙王杲燕王倓光祿大夫開府儀同三司行右翊衛大將軍宇文協金紫光祿大夫內史侍郎虞世基銀青光祿大夫御史大夫裴蘊通議大夫行給事郎許善心皆遇害化及立秦王浩爲帝自稱大丞相朝士文武皆受其

官爵光祿大夫宿公麥才折衝郎將朝請大夫沈光同謀討賊夜襲化及營反爲所害戊戌詔唐王備九錫之禮加璽紱遠遊冠綠綬綬位在諸侯王上唐國置丞相已下一依舊式五月乙巳朔詔唐王冕十有二旒建天子旌旗出警入蹕金根車駕備五時副車置旄頭雲罕車儻八佾設鍾虞宮懸王后王子王女爵命之號一遵舊典戊午詔曰天禍隋國大行太上皇遇盜江都酷甚望夷豎深驪北憫予小子奄逮丕讐哀號承感心情糜潰仰惟蒸毒仇復靡申形影相弔罔知啟處相國唐王膺期命世扶危拯溺自北徂南東征西怨總九合於一匡決百勝於千里糾率夷夏大庇氓黎保乂朕躬繫王是賴德侔造化功格蒼旻兆庶歸心曆數斯在屈爲人臣載違天命在昔虞夏揖讓相推苟非重華誰堪命禹當今九服崩離三靈改卜大運去矣請避賢路此謀布德顧已莫能私

僮命駕須歸藩國予本代王及予而代天之所廢豈期如是庶憑稽古之聖以誅四凶幸值惟新之恩預充三恪雪冤恥於皇祖守禋祀爲孝孫朝聞夕殞及泉無恨今遵故事遜於舊邸庶官羣辟改事唐朝宜依前典趣上尊號若釋重負感泰兼懷假手真人俾除醜逆濟濟多士明知朕意仍敕有司凡有表奏皆不得以聞是日上遜位於大唐以爲鄒國公武德二年夏五月崩時年十五史臣曰恭帝年在幼冲遭家多難一人失德四海土崩羣盜蜂起豺狼塞路南巢遂往流彘不歸旣鍾百六之期躬踐數終之運謳歌有屬笙鍾變響雖欲不遵堯舜之迹其庸可得乎

隋書卷五

帝紀第五

終

和川地國
氏書印

